

MISSÆ DEFUNCTORUM

Quamvis integræ Missæ, cum suis antiphonis et orationibus, commoditatis causa, proponantur, omnes textus cum aliis commutari possunt, præsertim ad orationes quod attinet, mutatis tamen genere aut numero, pro cuiusvis circumstantiæ opportunitate.

Item in orationibus, quæ pro exsequiis aut pro anniversario proponuntur, si in aliis circumstantiis adhibentur, omittantur verba, quæ minus apta evadant.

I. IN EXSEQUIIS

A

Ant. ad introitum

Cf. 4 Esd 2, 34-35

Réquiem ætérnam dona eis, Dómine,
et lux perpétua lúceat eis.

Collecta

Deus, Pater omnípotens,
cuius Fílium mórtuum fuisse et resurrexísse
fides nostra fatétur,
concéde propítius,
ut hoc mystério fámulus tuus **N.**, qui in illo dormívit,
per illum resúrgere lætétur.
Per Dóminum.

Vel:

Deus, cui próprium est miseréri semper et párcere,
te súpplices exorámus pro fámulo tuo **N.**,
quem (hódie) ad te migráre iussísti,
ut, quia in te sperávit et crédidit,
concédas eum ad veram pátriam perdúci,
et gáudiis pérfrui sempitérnis.
Per Dóminum.

Lectiones ut infra, pp. 1684-1722.

Super oblata

Pro fámuli tui **N.** salúte
hóstias tibi, Dómine, suppliciter offérimus
tuam cleméntiam deprecántes,
ut, qui Fílium tuum pium Salvatórem esse non dubitávit,
misericórdem Iúdicem invéniat.
Per Christum.

Præfatio de defunctis, pp. 615-619.

Ant. ad communionem

Cf. 4 Esd 2, 35. 34

Lux æténa lúceat eis, Dómine,
 cum Sanctis tuis in ætérnum, quia pius es.
 Réquiem æténam dona eis, Dómine,
 et lux perpétua lúceat eis,
 cum Sanctis tuis in ætérnum, quia pius es.

Post communionem

Dómine Deus, cuius Fílius in sacraménto Córporis sui
 viáticum nobis reliquit,
 concéde propítius, ut per hoc frater noster **N.**
 ad ipsam Christi pervéniat mensam æténam.
 Per Christum.

B

Ant. ad introitum

Apériat ei Dóminus paradísi iánuam,
 ut ad illam pátriam revertátur,
 ubi mors non est, ubi ætérnum gáudium persevérat.

Collecta

Deus, misericórdia peccatórum
 et tuórum beatitúdo Sanctórum,
 da, quæsumus, fámulo tuo **N.**,
 cuius depositiónis (hódie)
 offícia humanitátis persólvimus,
 cum eléctis tuis beáti múnere portiónem,
 ut eum, a mortalitátis néxibus absolútum,
 in die resurrectionis ante fáciem tuam
 præsentári concédas.
 Per Dóminum.

Lectiones ut infra, pp. 1684-1722.

Super oblata

Adesto, Dómine, quæsumus,
pro fámulo tuo **N.**,
cuius in die depositiónis
hoc sacrificium tibi placatiónis offérimus,
ut, si qua ei peccáti mácula inhæsit
aut vítium humánum infécit,
dono tuæ pietátis indúlgeas et abstérgeas.
Per Christum.

Præfatio de defunctis, pp. 615-619.

Ant. ad communionem**Phil 3, 20-21**

Salvatórem exspectámus
Dóminum nostrum Iesum Christum,
qui reformábit corpus humilitátis nostræ
configurátum córpori claritátis suæ.

Post communionem

Præsta, quæsumus, omnípotens Deus,
ut fámulus tuus **N.**,
qui (hódie) de hoc sáculo migrávit,
his sacrificiis purgátus et a peccátis expeditus,
resurrectiósus suscipiat gáudia sempitérna.
Per Christum.

C. Aliæ orationes pro Missa exsequiali**Collecta**

Deus, cui soli cómpetit vitam post mortem præstáre,
libera fámulum tuum **N.** ab ómnibus peccátis,
ut, qui Christi tui resurrectiósus credidit,
témptore resurrectiósus gloriósus tibi iungátur.
Per Dóminum.

Super oblata

Omnípotens et miséricors Deus,
 his sacrificiis áblue, quæsumus, fámulum tuum **N.**
 a peccátis suis in sángine Christi,
 ut, quem mundásti aqua baptísmatis,
 indesinéter purífices indulgéntia pietátis.
 Per Christum.

Post communionem

Sumpto sacraménto Unigéniti tui,
 qui pro nobis immolátus resurrexit in glória,
 te, Dómine, suppliciter exorámus pro fámulo tuo **N.**
 ut, paschálibus mystériis mundátus,
 futúre resurrectionis múnere gloriétur.
 Per Christum.

II. IN ANNIVERSARIO**A****Ant. ad introitum****Ap 21, 4**

Abstérget Deus omnem lácrimam ab óculis eórum,
 et mors ultra non erit, neque luctus, neque clamor,
 neque dolor erit ultra, quia prima transiérunt.

Collecta

Deus, glória fidélium et vita iustórum,
 cuius Fílii morte et resurrectione redémpti sumus,
 propitiáre fámulo tuo **N.**,
 ut, qui resurrectionis nostræ mystérium agnóvit,
 ætérnæ beatitúdinis gáudia percípere mereátur.
 Per Dóminum.

Lectiones ut infra, pp. 1684-1722.

Super oblata

Múnera, quæsumus, Dómine,
 quæ tibi pro fámulo tuo **N.** offérimus,
 placátus inténde,
 ut, remédiis purgátus cæléstibus,
 in tua glória semper vivus sit et beátus.
 Per Christum.

Præfatio de defunctis, pp. 615-619.

Ant. ad communionem **Io 11, 25; 3, 36; 5, 24**

Ego sum resurréctio et vita,
 dicit Dóminus.
 Qui credit in me,
 habet vitam ætérrnam,
 et in iudícium non venit,
 sed tránsiet de morte ad vitam.

Post communionem

Sacris reparáti mystériis,
 te, Dómine, suppliciter exorámus,
 ut fámulus **N.**, a delictis ómnibus emundátus,
 ætérrno resurrecciónis múnere ditári mereátur.
 Per Christum.

B**Ant. ad introitum**

Dómine Iesu, concéde réquiem ætérrnam eis,
 pro quibus tuum pretiósium effudísti Sánguinem.

Collecta

Quæsumus, Dómine, ut fámulo tuo **N.**,
 cuius depositiónis diem commemorámus,

rorem misericórdiæ tuæ perennem infúndas,
et Sanctórum tuórum largíri dignéris consórtium.
Per Dóminum.

Lectiones ut infra, pp. 1684-1722.

Super oblata

Adésto, Dómine, supplicatióibus nostris
pro fámulo tuo **N.**,
cuius hódie ánnua dies ágitur,
ut, per hoc sacrificium propitiatiónis et laudis,
eum Sanctórum tuórum consórtio sociáre dignéris.
Per Christum.

Præfatio de defunctis, pp. 615-619.

Ant. ad communionem

Qui es, Dómine, réquies post labórem,
qui es vita post mortem,
tu dona eis réquiem sempitérnam.

Post communionem

Précibus nostris et sacrificiis, Dómine,
pro fámulo tuo **N.** benígne suscéptis,
te súpplices deprecámur,
ut, si quæ ei máculæ peccáti adhæsérunt,
remissiónis tuæ misericórdia deleántur.
Per Christum.

C. Aliæ orationes in anniversario

Collecta

Concéde, quæsumus, Dómine,
per beátam Fílii tui passiónem,
fámulo tuo **N.** remissiónem,

quam semper optávit, peccatórum,
ut, te in veritatē cognóscens,
visiónē tuā iúgiter pérfrui mereátur.
Per Dóminum.

Super oblata

Sacrificiū tibi, Dómine, pro fámulo tuo **N.**
supplíciter offérimus,
ut, qui te iam dono tuæ illuminatiónis agnóvit,
tibi adhærere perpétuo lætétur.
Per Christum.

Post communionem

Repléti alimónia reparatiónis et vitæ, quæsumus, Dómine,
ut per eam frater noster **N.**,
ab ómnibus peccátis emundátus,
ad cæléste váleat transíre consórtium.
Per Christum.

D. Aliæ orationes in anniversario

Collecta

Deus indulgentiárum, da fámulo tuo **N.**,
cuius anniversáriū depositiόνis diem celebrámus,
refrigérii sedem, quiétis beatitudinem
et lúminis claritátem.
Per Dóminum.

Super oblata

Supplicatió tibi nostra, Dómine,
et grata páriter exsístat oblátio,
ut fámulo tuo **N.**, pro cuius salute defértur,
plenitudinem tuæ redemptiόνis acquirat.
Per Christum.

Post communionem

Præsta, quæsumus, omnipotens Deus,
ut famulus tuus **N.**,
pro quo hoc sacrificium tuæ obtulimus maiestati,
per huius virtutem sacramenti
a peccatis omnibus expiatus,
lucis perpetuæ, te miserante, recipiat beatitudinem.
Per Christum.

III. IN VARIIS COMMEMORATIONIBUS**A. Pro uno defuncto****Ant. ad introitum**

Apériat ei Dóminus paradísi iánuam,
ut ad illam pátriam revertátur,
ubi mors non est, ubi gáudium ætérnum perseverat.

Collecta

Deus, Pater omnipotens,
qui nos crucis mystério confirmásti
et Fílii tui resurrectionis sacraménto signásti,
concéde propítius famulo tuo **N.**,
ut, mortalitátis néxibus expéditus,
electórum tuórum aggregétur consórtio.
Per Dóminum.

Vel:

Inclína, Dómine, aurem tuam ad preces nostras,
quibus misericórdiam tuam súplices deprecámur,
ut famulum tuum **N.**,
quem in hoc sǎculo tuo pópulo misericórditer aggregásti,

in pacis ac lucis regiõne constítuas,
et Sanctõrum tuõrum concédas esse consórtem.
Per Dóminum.

Lectiones ut infra, pp. 1684-1722.

Super oblata

Propitiáre, quæsumus, Dómine, fámulo tuo **N.**,
pro quo hóstiam tibi laudis immolámus,
te suppliciter deprecántes,
ut, per hæc piæ placatiõnis offícia,
resúrgere mereátur ad vitam.
Per Christum.

Præfatio de defunctis, pp. 615-619.

Ant. ad communionem

Io 6, 37

Omne quod dat mihi Pater, ad me véniet, dicit Dóminus,
et eum qui venit ad me, non eíciam foras.

Post communionem

Vitalibus refécti sacraméntis, quæsumus, Dómine,
ut frater noster **N.**,
quem testaménti tui partícipem effecísti,
huius mystérii purificátus virtúte,
in pace Christi sine fine lætétur.
Per Christum.

B. Pro uno defuncto

Ant. ad introitum

Iob 19, 25. 26

Scio quod Redémptor meus vivit,
et in novíssimo die de terra surrectúrus sum,
et in carne mea vidébo Deum meum.

Collecta

Absólve, quæsumus, Dómine, fámulum tuum **N.**
 ab omni vínculo delictórum,
 ut, qui in hoc sáculo Christo méruit conformári,
 in resurrectiόνis glória
 inter Sanctos tuos resuscitátus respíret.
 Per Dóminum.

Lectiones ut infra, pp. 1684-1722.

Super oblata

Annue nobis, quæsumus, Dómine,
 ut fámulo tuo **N.** hæc prosit oblátio,
 quam immolándo, totíus mundi tribuísti relaxári delícta.
 Per Christum.

Præfatio de defunctis, pp. 615-619.

Ant. ad communionem

Cf. Io 6, 50

Hic est panis de cælo descéndens, dicit Dóminus;
 si quis ex ipso manducáverit, non moriétur in ætérnum.

Post communionem

Prosit, quæsumus, Dómine, fámulo tuo **N.**
 sacrificíum Ecclésiæ tuæ,
 ut, cum Sanctis, Christi consórtium invéniat,
 cuius misericórdiæ consecútus est sacraméntum.
 Per Christum.

C. Pro pluribus aut pro omnibus defunctis

Ant. ad introitum

Dona eis, Dómine, réquiem sempitérnam
 et imple splendóribus ánimas eórum.

Collecta

Deus, qui Unigénitum tuum, devícta morte,
ad cæléstia transíre fecísti,
concéde fámulis tuis (N. et N.),
ut, huius vitæ mortalitáte devícta,
te conditórem et redemptórem
possint perpétuo contemplári.
Per Dóminum.

Vel:

Fidélium, Deus, ómnium cónditor et redéptor,
fámulis tuis remissionem cunctórum tríbe peccatórum,
ut indulgéntiam, quam semper optavérunt,
piis supplicatióibus consequántur.
Per Dóminum.

Lectiones ut infra, pp. 1684-1722.

Super oblata

Hóstias, quæsumus, Dómine,
quas tibi pro fámulis tuis offérimus,
propitiátus inténde,
ut, quibus fídei cristiánæ méritum contulísti,
dones et præmium.
Per Christum.

Præfatio de defunctis, pp. 615-619.

Ant. ad communionem**1 Io 4, 9**

Fílium suum unigénitum misit Deus in mundum,
ut vivámus per eum.

Post communionem

Múltiplica, Dómine, his sacrificiis susceptis,
super fámulos tuos defúctos misericórdiam tuam,

et, quibus donásti baptísmi grátiam,
da eis æternórum plenitúdinem gaudiórum.
Per Christum.

Vel:

Fámulis tuis, quæsumus, Dómine,
orátio proficiat supplicántium,
ut eos, his sacrificiis, et a peccátis ómnibus éxuas,
et æternæ salvatiónis fácias esse participes.
Per Christum.

D. Pro pluribus aut pro omnibus defunctis

Ant. ad introitum

Io 3, 16

Sic Deus diléxit mundum,
ut Fílium suum unigénitum daret;
ut omnis qui credit in ipsum non péreat,
sed hábeat vitam æternam.

Collecta

Omnípotens sempitérne Deus,
vita mortálium et exsultátio Sanctórum,
te súplices exorámus pro fámulis tuis (**N.** et **N.**),
ut, mortalitátis néxibus expediti,
regnum tuum in glória possídeant sempitérna.
Per Dóminum.

Vel:

Omnípotens sempitérne Deus,
qui vivórum domináris simul et defunctórum,
omniúmque miseréris,
te supplicíter exorámus,
ut, pro quibus effúndimus preces,
pietátis tuæ cleméntia

delictórum suórum véniam consequántur,
et de te beáti congáudeant ac te sine fine colláudent.
Per Dóminum.

Lectiones ut infra, pp. 1684-1722.

Super oblata

Pro fámulis tuis N. et N.
et ómnibus in Christo dormiéntibus
hóstiam, Dómine, súscipe benígnus oblátam,
ut, per hoc sacrificíum singuláre vínculis mortis exúti,
vitam mereántur ætérrnam.
Per Christum.

Præfatio de defunctis, pp. 615-619.

Ant. ad communionem

Phil 3, 20-21

Salvatórem exspectámus
Dóminum nostrum Iesum Christum,
qui reformábit corpus humilitátis nostræ
configurátum córpori claritátis suæ.

Post communionem

Divína participántes mystéria,
quæsumus, omnípotens Deus,
ut hæc éadem nobis proficiant ad salútem,
et fámulis tuis defúnttis,
pro quibus tuam deprecámur cleméntiam,
prosint ad indulgéntiam.
Per Christum.

E. Pro pluribus aut pro omnibus defunctis

Ant. ad introitum

Ap 14, 13

Beáti mórtui, qui in Dómino moriúntur.
Amodo requiéscant a labóribus suis:
ópera enim illórum sequúntur illos.

Collecta

Deus, cuius miseratióne fidéles requiésunt,
 fámulis tuis **N.** et **N.** et ómnibus in Christo quiescéntibus
 da propítius véniam peccatórum,
 ut, a cunctis reátibus absolúti,
 Christi tui resurrectióri sociéntur.
 Qui tecum vivit.

Vel:

Quásumus, Dómine,
 fámulis tuis defúnctis misericórdiam concéde perpétuam,
 ut eis proficiat in ætérnum
 quod in te speravérunt et credidérunt.
 Per Dóminum.

Lectiones ut infra, pp. 1684-1722.

Super oblata

Múnera, Dómine, quásumus,
 quæ pro tuórum réquie famulórum offérimus,
 placátus inténde,
 ut, per hæc salútis humanæ subsidiá,
 tuórum número redemptórum sorte perpétua censeántur.
 Per Christum.

Præfatio de defunctis, pp. 615-619.

Ant. ad communionem

Pro quorum memória Corpus et Sanguis Christi súmitur,
 dona eis, Dómine, réquiem sempitérnam.

Post communionem

Súmpsimus, Dómine, redemptióri sacraménta,
 tuam cleméntiam obsecrántes,
 ut, te miseránte, nobis vivéntibus tutelam obtíneant,
 et defúnctis nostris véniam sempitérnam.
 Per Christum.

Vel:

Invéniant, quæsumus, Dómine, fámuli tui,
omnésque in Christo quiescéntes,
lucis ætérnæ consórtium,
qui, in hac luce pósito, tuum consecúti sunt sacraméntum.
Per Christum.

IV. ORATIONES PRO DEFUNCTIS

1. PRO PAPA

A

Collecta

Deus, fidélis remunerátor animárum,
præsta, ut fámulus tuus Papa noster **N.**,
quem Petri constituísti vicárium
et Ecclésiæ tuæ pastórem,
grátia et miseratiónis tuæ mystériis,
quæ fidénter dispensávit in terris,
lætánter apud te perpétuo fruátur in cælis.
Per Dóminum.

Super oblata

Quæsumus, Dómine, ut, per hæc piæ placatiónis officia,
fámulum tuum Papam nostrum **N.**
beáta retribútio comitétur,
et misericórdia tua nobis grátia dona concíliet.
Per Christum.

Post communionem

Divínæ tuæ communiónis refécti sacraméntis,
quæsumus, Dómine,
ut fámulus tuus Papa noster **N.**

quem Ecclésiæ tuæ
visibile voluisti fundaméntum unitátis in terris,
beatitudíni gregis tui feliciter aggregétur.
Per Christum.

B**Collecta**

Deus, qui Ecclésiæ tuæ fámulum tuum Papam nostrum **N.**
ineffábili tua dispositióne præesse voluisti,
præsta, quæsumus, ut, qui Fílii tui vices gerébat in terris,
ab ipso in glória recipiátur æténa.
Per Dóminum.

Super oblata

Múnera, Dómine, supplicántis Ecclésiæ réspice propítius,
et, huius sacrificii virtúte, concéde,
ut fámulus tuus Papa noster **N.**,
quem sacerdotem magnum tuo gregi præfecisti,
in electórum tuórum número constituas sacerdotum.
Per Christum.

Post communionem

Caritátis tuæ, Dómine, suméntes sacra subsidia,
quæsumus, ut fámulus tuus Papa noster **N.**
misericórdiam tuam in Sanctórum glória
perpétuo colláudet, qui fidélis éxstitit
mysteriórum tuórum dispensátor in terris.
Per Christum.

C**Collecta**

Deus, immortalis pastor animárum,
réspice pópulum supplicántem, et præsta,
ut fámulus tuus Papa noster **N.**

qui Ecclesiæ tuæ in caritate præfuit,
fidélis dispensatóris remuneratióem
cum grege sibi crédito misericórditer consequátur.
Per Dóminum.

Super oblata

Oblatióem pacíficam pópuli tui, quæsumus, Dómine,
propítius intuére,
qua fámulum tuum Papam nostrum **N.**
tuæ misericórdiæ fidénter commítimus, et præsta,
ut, qui tuæ caritátis et pacis
in humána família fuit instruméntum,
eárum fructu cum Sanctis tuis perpétuo lætári mereátur.
Per Christum.

Post communionem

Ad mensam ætérni accedéntes convívii,
misericórdiam tuam, Dómine,
pro fámulo tuo Papa nostro **N.**
supplíciter implorámus,
ut veritátis possessióe tandem congáudeat,
in qua pópulum tuum fidénter confirmávit.
Per Christum.

2. PRO EPISCOPO

A. Pro Episcopo diœcesano

Collecta

Da, quæsumus, omnípotens Deus,
ut fámulus tuus **N.** epíscopus noster,
cui famíliæ tuæ curam tradidísti,
cum múltiplici labóris fructu
gáudia Dómini sui ingrediátur ætérna.
Per Dóminum.

Super oblata

Imménsam cleméntiam tuam, Dómine,
 suppliciter implorámus,
 ut hoc sacrificium,
 quod fámulus tuus **N.** epíscopus noster,
 dum esset in córpore,
 maiestáti tuæ pro salúte fidélium óbtulit,
 ipsi nunc prosit ad véniam.
 Per Christum.

Post communionem

Prosit, quæsumus, Dómine,
 fámulo tuo **N.** epíscopo nostro
 misericórdiæ tuæ imploráta cleméntia,
 ut Christi, in quo sperávit et quem prædicávit,
 ætérnum cápiat, his sacrificiis, consórtium.
 Per Christum.

B. Pro alio Episcopo**Collecta**

Deus, qui inter apostólicos sacerdotés
 fámulum tuum **N.** epíscopum (**vel** cardinálem)
 pontificáli fecísti dignitáte vigére,
 præsta, quæsumus,
 ut eórum quoque perpétuo aggregétur consórtio.
 Per Dóminum.

Super oblata

Súscipe, Dómine, quæsumus,
 pro fámulo tuo **N.** epíscopo (**vel** cardináli)
 quas tibi offérimus hóstias,
 ut, cui in hoc sæculo pontificále donásti méritum,
 in cælésti regno
 Sanctórum tuórum iúbeas iungi consórtio.
 Per Christum.

Post communionem

Quæsumus, omnipotens et miséricors Deus,
ut famulum tuum **N.** episcopum (*vel* cardinalem),
quem in terris pro Christo legatione fungi tribuisti,
his emundatum sacrificiis,
consedere facias in cælestibus cum ipso.
Per Christum.

3. PRO SACERDOTE**A****Collecta**

Præsta, quæsumus, Dómine,
ut famulus tuus **N.** sacerdos,
quem in hoc sæculo commorantem
sacris munéribus decorasti,
in cælesti sede gloriósus semper exsultet.
Per Dóminum.

Super oblata

Concede, quæsumus, omnipotens Deus,
ut famulus tuus **N.** sacerdos,
per hæc sancta mystéria,
conspéctu semper claro conspiciat
quæ hic fidéliter ministrávit.
Per Christum.

Post communionem

Sumptis salutáribus sacraméntis,
implorámus, Deus, cleméntiam tuam,
ut famulum tuum **N.** sacerdotem,
quem fecisti mysteriórum tuórum dispensatórem in terris,
eórum facias in cælis apérta veritate nutriri.
Per Christum.

B

Collecta

Preces nostras, quæsumus, Dómine,
 quas pro fámuli tui **N.** sacerdotís salúte
 suppliciter deférimus,
 propitiátus exáudi,
 ut, qui nómini tuo ministérium fidéle depéndit,
 perpétua Sanctórum tuórum societáte lætétur.
 Per Dóminum.

Super oblata

Quæsumus, Dómine, cleméntiam tuam,
 ut hoc sacrificium servitútis nostræ,
 pro fámulo tuo **N.** sacerdote oblátum,
 ipsi nunc prosit ad véniam,
 qui illud in Ecclésia devóta tibi mente exhibuit.
 Per Christum.

Post communionem

Mensæ cæléstis alimónia refécti,
 te, Dómine, suppliciter exorámus,
 ut, huius virtúte sacrificií,
 fámulus tuus **N.** sacerdos
 ante conspéctum tuum semper exsúltet,
 qui in Ecclésia tua fidéliter ministrávit.
 Per Christum.

4. PRO DIACONO

Collecta

Concéde, quæsumus, miséricors Deus,
 fámulo tuo **N.** diácono felicitátis ætérnæ consórtium,
 cui donásti in Ecclésia tua cónsequi ministérium.
 Per Dóminum.

Super oblata

Propitiare, Dómine, fámulo tuo **N.** diácono,
pro cuius salúte hoc tibi sacrificium offérimus,
ut, sicut Christo Fílio tuo ministrávit in carne,
cum fidélibus servis exsúrgat in glóriam sempitérnam.
Per Christum.

Post communionem

Munéribus sacris repléti,
te, Dómine, humíliter deprecámur,
ut per hoc sacrificium fámulum tuum **N.** diáconum,
quem inter servos Ecclésiæ tuæ vocásti,
a mortis vínculis absolútum,
cum iis qui bene ministravérunt partem recíperere
et in gáudium tuum intráre benigne concédas.
Per Christum.

5. PRO RELIGIOSO**Collecta**

Præsta, quæsumus, omnípotens Deus, ut fámulus tuus **N.**,
qui pro Christi amóre perféctæ caritátis viam percúrrit,
in advéntu glóriæ tuæ lætétur,
et cum frátribus suis
de regni tui beatitúdine gáudeat sempitérna.
Per Dóminum.

6. PRO UNO DEFUNCTO**A****Collecta**

Deus, apud quem mórtui vivunt
et in quo Sancti tui plena felicitáte lætántur,
præsta supplicántibus nobis,

ut fámulus tuus **N.**,
 qui nunc temporáli huius mundi lúmíne caret,
 ætérnæ tuæ lucis solátio perfruátur.
 Per Dóminum.

Super oblata

Pláceat tibi, Dómine, sacrificií præsentis oblátio,
 ut fámulus tuus **N.**,
 peccatórum véniam, quam quæsívit,
 te miseránte invéniens,
 cum Sanctis tuis semper exsúltet,
 et glóriam tuam in ætérnum colláudet.
 Per Christum.

Post communionem

Suméntes dona cæléstia, grátias tibi, Dómine, reférimus,
 humíliter deprecántes, ut fámulus tuus **N.**,
 per Fílii tui passiónem a peccatórum vínculis absolútus,
 feliciter váleat ad te perveníre.
 Per Christum.

B

Collecta

Ascéndant ad te, Dómine, preces nostræ,
 et fámulum tuum **N.** gáudia ætérna suscípíant,
 ut, quem ad imáginem tuam créare dignátus es
 et adoptiónis partícipem fecísti,
 iúbeas hereditátis tuæ esse consórtem.
 Per Dóminum.

Super oblata

Oblatióem nostram, quæsumus, Dómine,
 quam pro fámulo tuo **N.** fidénter exhibémus,
 placátus accípías,

ut ei per hoc sacrificium,
quod cunctis esse remedium singulare voluisti,
salutem tribuas sempiternam. Per Christum.

Post communionem

Recreati sacri muneris alimonia, quaesumus, Domine,
ut frater noster N., mortis vinculis absolutus,
resurrectionis Filii tui participatione laetetur.
Per Christum.

C

Collecta

Inclina, Domine, precibus nostris aures tuae pietatis,
et famulo tuo N.
remissionem omnium tribue peccatorum,
ut in resurrectionis die vivat,
et in lucis aemunitate requiescat.
Per Dominum.

Super oblata

Omnipotens sempiternae Deus,
cuius Filius panem vitae nobis praebeuit semetipsum,
et Sanguinem suum in poculum salutis effudit,
miserere famuli tui N.,
ut, quod tibi offerimus, sit illi causa salutis.
Per Christum.

Post communionem

Aeternae pignus vitae capientes,
te, Domine, humiliter imploramus pro famulo tuo N.,
ut, mortalibus nexibus expeditus,
redemptorum possit adunari consortio.
Per Christum.

7. PRO IUVENE DEFUNCTO

Collecta

Deus, qui ómnium hóminum vitam moderáris et témpora, hunc fámulum tuum **N.**, quem consummátum in brevi deflémus, tibi humíliter commendámus, ut in beatitúdine domus tuæ perénni fácias iuventúte vigére. Per Dóminum.

8. PRO DEFUNCTO
QUI IN SERVITIO EVANGELII LABORAVIT

Collecta

Misericórdiam tuam, Dómine, pro fámulo tuo **N.** súpplīces deprecámur, ut, qui pro Evangélio dilatándo allaborávit assíduus, ad præmia regni mereátur intráre secúrus. Per Dóminum.

9. PRO DEFUNCTO
POST LONGAM INFIRMITATEM CONSUMPTO

Collecta

Deus, qui fámulo tuo **N.** dedísti in ærúm̄nis tibi et infirmitáte servíre, concéde, quæsumus, ut, qui Fílii tui secúsus est patiéntiæ documéntum, eiúsdem glóriæ consequátur et præmium. Per Dóminum.

10. PRO DEFUNCTO
REPENTINA MORTE SUBLATO

Collecta

Imménsam, Dómine, tuæ bonitátis osténde virtútem,
ut, qui fratrem nostrum **N.**
repentína flemus morte sublátum,
ad tuum confidámus transísse consórtium.
Per Dóminum.

11. PRO PLURIBUS DEFUNCTIS

A

Collecta

Propitiáre, Dómine, fámulis tuis **N.** et **N.**,
ut, quos regeneratiónis fonte mundásti,
ad cæléstis vitæ beatitúdinem fácias perveníre.
Per Dóminum.

Super oblata

Pro fámulis tuis **N.** et **N.**, Dómine,
tibi sacrificium offeréntes,
súplices exorámus,
ut ad tuam misericórdiam illis conferéndam perpétuam
dignánte vota nostra perfícias.
Per Christum.

Post communionem

Sumptis, Dómine, cæléstibus sacraméntis,
tuam cleméntiam humíliter deprecámur,
ut fámuli tui,
percipiéntes hoc múnere véniam peccatórum,
regnum tuum introíre,
teque in ætérnum mereántur collaudáre.
Per Christum.

B**Collecta**

Tibi, Dómine, commendámus fámulos tuos **N.** et **N.**,
ut defúncti sáculo tibi vivant,
et quæ, per fragilitátem carnis, peccáta
in mundi conversatióne commiserunt,
tu vénia misericordíssimæ pietátis abstérge.
Per Dóminum.

Super oblata

Propitiáre, quæsumus, Dómine,
fámulis tuis **N.** et **N.**,
pro quibus tibi hóstias placatiónis offérimus,
et quia in hac vita tibi mansérunt fidéles,
apud te pia illis retribútio donétur.
Per Christum.

Post communionem

Præsta, quæsumus, omnípotens Deus,
ut fámulos tuos, per huius sacraménti virtútem,
in congregatióne iustórum
ætérnæ beatitúdinis iúbeas esse consórtes.
Per Christum.

C**Collecta**

Omnípotens sempitérne Deus,
cui numquam sine spe misericórdiæ supplicátur,
propitiáre fámulis tuis **N.** et **N.**,
ut, qui de hac vita in tui nóminis confessiône discessérunt,
Sanctórum tuórum número fácias aggregári.
Per Dóminum.

Super oblata

Dómine Deus, cuius Fílius
se tibi óbtulit hóstiam vivam,
áccipe, quáesumus, Ecclésiæ tuæ sacrificium,
ut fámuli tui **N.** et **N.**, a peccátis ómnibus absolúti,
ad præmium immortalitátis mereántur pertíngere.
Per Christum.

Post communionem

Puríficent nos, quáesumus,
omnípotens et miséricors Deus,
sacraménta quæ sumpsimus, et præsta,
ut hoc sacrificium sit nobis intercésio ad véniam,
sit fragílium fortitúdo,
sit in ómnibus firmaméntum,
sit vivis atque defúntis remíssio ómnium peccatórum,
et pignus redemptiónis ætérnæ.
Per Christum.

12. PRO CONIUGIBUS DEFUNCTIS**Collecta**

Fámulos tuos **N.** et **N.**,
quáesumus, Dómine, miserátus absólve,
ut, quos coniugális amor in hac vita fidéliter sociávit,
in ætérra, tuæ caritátis plenitúdo coniúngat.
Per Dóminum.

Vel (pro uno tantum coniuge defuncto):

Fámulum tuum (Fámulam tuam) **N.**,
quáesumus, Dómine,
miserátus absólve,
et fámulam tuam (fámulum tuum) **N.**

contínua pietáte custódi,
 ut, quos coniugális amor in hac vita fidéliter sociávit,
 in ætérna, tuæ caritátis plenitúdo coniúgat.
 Per Dóminum.

13. PRO PARENTIBUS

Collecta

Deus, qui nos patrem et matrem honoráre præcepísti,
 miserére cleménter patri et matri meæ
 (paréntibus nostris),
 eorúmque peccáta dimítte,
 meque (nosque) eos in ætérnæ claritátis gáudio
 fac vidére.
 Per Dóminum.

Super oblata

Súscipe sacrificium, Dómine,
 quod tibi pro patre et matre mea
 (paréntibus nostris) offérimus,
 eisque gáudium sempitérnum
 in regióne vivórum concéde,
 meque (nosque) cum illis
 felicitáti Sanctórum coniúge.
 Per Christum.

Post communionem

Cæléstis participátio sacraménti,
 quæsumus, Dómine,
 patri et matri meæ (paréntibus nostris)
 réquiem et lucem obtíneat perpétuam,
 meque (nosque) cum illis glória tua sátiet sempitérna.
 Per Christum.

14. PRO DEFUNCTIS FRATRIBUS, PROPINQUIS ET BENEFECTORIBUS

Collecta

Deus, véniaē largitor et humánae salútis amátor,
quæsumus cleméntiam tuam,
ut nostræ congregatiónis fratres,
propínquos et benefactóres,
qui ex hoc sáculo transiérunt,
beáta María semper Vírgine intercedénte
cum ómnibus Sanctis tuis,
ad perpétuæ beatitúdinis consórtium perveníre concédas.
Per Dóminum.

Super oblata

Deus, cuius misericórdiæ non est númerus,
súscipe propítius preces humilitátis nostræ,
et animábus fratrum,
propinquórum et benefactórum nostrórum,
per hæc sacraménta salútis nostræ,
cunctórum remissionem tríbue peccatórum.
Per Christum.

Post communionem

Præsta, quæsumus, omnipotens et miséricors Deus,
ut ánimæ fratrum, propinquórum
et benefactórum nostrórum,
pro quibus hoc sacrificium laudis
tuæ obtúlimus maiestáti,
per huius virtútem sacraménti
a peccátis ómnibus expiátæ,
lucis perpétuæ, te miseránte, recípiant beatitúdinem.
Per Christum.

Lectio prima

1

Scio quod Redemptor meus vivit.

Lectio libri Iob

19, 1. 23-27 a

Respondens Iob dixit: « Quis mihi tríbuat ut scribántur sermónes mei? Quis mihi det ut exaréntur in libro stilo férreo, et plumbi lámina vel celte sculpántur in sílice?

Scio enim quod redémptor meus vivit, et in novísimo die de terra surrectúrus sum. Et rursus circúmdabor pelle mea et in carne mea vidébo Deum meum. Quem visúrus sum ego ipse ». — Verbum Dómini.

Psalmus responsorius

Ps 26, 1. 4. 7 et 8 b et 9 a. 13-14 (R.: 13)

R. Credo vidére bona Dómini in terra vivéntium.

¹ Dóminus illuminátio mea et salus mea, quem timébo? Dóminus protéctor vitæ meæ, a quo trepidábo? R.

⁴ Unum pétii a Dómino, hoc requíram: ut inhábitem in domo Dómini ómnibus diébus vitæ meæ, ut vídeam voluptátem Dómini et vísitem templum eius. R.

⁷ Exáudi, Dómine, vocem meam qua clamávi, miserére mei et exáudi me.

⁸ Fáciem tuam, Dómine, requíram.

⁹ Ne avértas fáciem tuam a me. R.

¹³ Credo vidére bona Dómini in terra vivéntium.

¹⁴ Exspécta Dóminum, viríliter age, et confortétur cor tuum, et sústine Dóminum. R.

2

* *Quasi holocausti hostiam accepit illos.*

Lectio libri Sapiéntiæ

3, 1-9

Iustórum ánimæ in manu Dei sunt, et non tanget illos torméntum mortis. Visi sunt óculis insipiéntium mori, et æstimáta est afflíctio éxitus illórum, et quod a nobis est iter, extermínium; illi autem sunt in pace.

Et si coram homínibus torménta passi sunt, spes illórum immortalitáte plena est.

In paucis vexáti in multis bene disponéntur, quóniam Deus tentávit eos et invénit illos dignos se.

Tamquam aurum in fornáce probávit illos, et quasi holocáusti hóstiam accépit illos, et in témpore erit respéctus illórum.

Fulgébunt iusti et tamquam scintillæ in arundineto discúrrent; iudicábunt natiónes et dominabúntur pópulis, et regnábít Dóminus illórum in perpétuum.

Qui confídunt in illo intéllegent veritátem, et fidéles in dilectiône acquiescent illi, quóniam donum et pax est eléctis eius. — Verbum Dómini.

vel brevior

Lectio libri Sapiéntiæ

3, 1-6. 9

Iustórum ánimæ in manu Dei sunt, et non tanget illos torméntum mortis. Visi sunt óculis insipiéntium mori, et æstimáta est afflíctio éxitus illórum, et quod a nobis est iter, extermínium; illi autem sunt in pace.

Et si coram homínibus torménta passi sunt, spes illórum immortalitáte plena est.

In paucis vexáti in multis bene disponéntur, quóniam Deus tentávit eos et invénit illos dignos se.

Tamquam aurum in fornáce probávit illos, et quasi holocáusti hóstiám accépit illos, et in témpore erit respéctus illórum.

Qui confidunt in illo intéllegent veritátem, et fidéles in dilectióne acquiescent illi, quóniam donum et pax est eléctis eius. — Verbum Dómini.

Psalmus responsorius

Ps 114, 5 et 6; 115, 10-11. 15-16 ac (R.: Ps 114, 9)

R. Ambulábo coram Dómino in regione vivéntium.

vel Allelúia.

- 5 Miséricors Dóminus et iustus,
et Deus noster miserétur.
- 6 Custódiens párvulos Dóminus;
humiliátus sum, et salvum me fáciat. R.
- 10 Crédidi, étiam cum locútus sum:
« Ego humiliátus sum nimis ».
- 11 Ego dixi in trepidatióne mea:
« Omnis homo mendax ». R.
- 15 Pretiósá in conspéctu Dómini
mors sanctórum eius.
- 16 O Dómine, ego servus tuus.
Dirupísti víncula mea. R.

3

Ætas senectutis vita immaculata.

Léctio libri Sapiéntiæ

4, 7-15

Iustus, si morte præoccupátus fúerit, in refrigério erit; senéctus enim venerábilis est non diutúrna neque annórum número computáta; cani autem sunt sensus hóminis, et ætas senectútis vita immaculáta.

Placens Deo factus est diléctus, et vivens inter peccatóres translátus est: raptus est, ne malítia mutáret intelléctum eius, aut ne fíctio decíperet ánimam illíus; fascinátio enim nugacitátis obscúrat bona, et inconstántia concupiscéntiæ transvértit sensum sine malítia.

Consummátus in brevi explévit témpora multa; plácita enim erat Deo ánima illíus, propter hoc prope rávit edúcere illum de médio iniquitátum.

Pópuli autem vidéntes et non intellegéntes, nec ponéntes in præcórdiis tália, quóniam grátia Dei et misericórdia est in sanctos eius et respéctus in eléctos illíus. — Verbum Dómini.

Psalmus responsorius Ps 22, 1-3. 4. 5. 6 (R.: 4 a b)

R. Si ambulávero in valle umbræ mortis,
non timébo mala, quóniam tu mecum es.

1 Dóminus pascit me, et nihil mihi déerit:

2 in páscuis viréntibus me collocávit,

super aquas quiétis edúxit me,

3 ánimam meam refécit.

Dedúxit me super sémitas iustítiæ propter nomen suum **R.**

4 Nam et si ambulávero in valle umbræ mortis,

non timébo mala, quóniam tu mecum es.

Virga tua et báculus tuus

ipsa me consoláta sunt. **R.**

5 Parásti in conspéctu meo mensam

advérsus eos qui tríbulant me;

impinguásti in óleo caput meum,

et calix meus redúndat. **R.**

6 Etenim benígnitas et misericórdia subsequéntur me

ómnibus diébus vitæ meæ,

et inhabitábo in domo Dómini

in longitudinem diérum. **R.**

Præcipitabit Dominus mortem in sempiternum.

Léctio libri Isaíæ prophétæ

25, 6 a. 7-9

In die illa:

Fáciet Dóminus exercítuum ómnibus pópulis in monte hoc convívium pínguim.

Et præcipitábit in monte isto fáciem vínculi col- ligáti super omnes pópulos, et telam quam ordítus est super omnes natiónes.

Præcipitábit mortem in sempitérnum, et áuferet Dóminus Deus lácrimam ab omni fácie, et oppróbrium pópuli sui áuferet de univérſa terra, quia Dóminus locútus est.

Et dicet in die illa: « Ecce Deus noster iste, expec- távimus eum, et salvábit nos; iste Dóminus, sustinúimus eum: exsultábimus et lætábimur in salutári eius ».

Verbum Dómini.

Psalmus responsorius

Ps 22, 1-3. 4. 5. 6 (R.: 1)

R̄. Dóminus pascit me, et nihil mihi déerit.

¹ Dóminus pascit me, et nihil mihi déerit:

² in páscuis viréntibus me collocávit,

super aquas quiétis edúxit me,

³ ánimam meam refécit.

Dedúxit me super sémitas iustítiæ propter nomen suum R̄.

⁴ Nam et si ambulávero in valle umbræ mortis,

non timébo mala, quóniam tu mecum es.

Virga tua et báculus tuus

ipsa me consoláta sunt. R̄.

⁵ Parásti in conspéctu meo mensam

advérsus eos qui tríbulant me;

impinguásti in óleo caput meum,
et calix meus redúndat. **R.**

Etenim benignitas et misericórdia subsequéntur me
ómnibus diébus vitæ meæ,
et inhabitábo in domo Dómini
in longitudinem diérum. **R.**

5

Bonum est præstolari cum silentio salutare Dei.

Léctio libri Lamentatiónum

3, 17-26

Repúlsa est a pace ánima mea, oblítus sum bonórum,
et dixi: « Périit finis meus, et spes mea a Dómino ».

Recordáre paupertátis et transgressiόνis meæ, ab-
sínthii et fellis; memória memor ero et tabéscet in me
ánima mea: hæc récolens in corde meo, ídeo sperábo.

Misericórdiæ Dómini, quia non sumus consúpti,
quia non defecérunt miseratiónes eius. Novi dilúculo,
multa est fides tua.

« Pars mea Dóminus », dixit ánima mea; proptérea
exspectábo eum.

Bonus est Dóminus sperántibus in eum, ánimæ
quærénti illum; bonum est præstolari cum siléntio sa-
lutáre Dei. — Verbum Dómini.

Psalmus responsorius

Ps 24, 6-7 bc. 17-18. 20-21 (R.: 3 b)

R. Qui sústinent te, Dómine, non confundéntur.

⁶ Reminíscere miseratiónum tuárum, Dómine,
et misericordiárum tuárum, quóniam a sæculo sunt.

⁷ Secúndum misericórdiam tuam meménto mei tu,
propter bonitátem tuam, Dómine. **R.**

- 17 Diláta angústias cordis mei,
et de necessitátibus meis érué me.
- 18 Vide humilitátem meam et labórem meum,
et dimítte univérsa delícta mea. *R.*
- 20 Custódi ánimam meam, et érué me;
non erubéscam, quóniam sperávi in te.
- 21 Innocéntia et áquitas custódiant me,
quia sustínui te. *R.*

6

Qui dormiunt in terræ pulvere evigilabunt.

Léctio libri Daniélis prophétæ

12, 1-3

In diébus illis, ego Dániel lugébam, et audívi hoc verbum Dómini: « In témpore illo consúrget Míchael princeps magnus, qui stat pro filiis pópuli tui; et véniet tempus quale non fuit ab eo ex quo gentes esse cœpérunt usque ad tempus illud.

Et in témpore illo salvábitur pópulus tuus, omnis qui invéntus fúerit scriptus in libro.

Et multi de his qui dórmiunt in terræ púlvere evigilábunt: álii in vitam ætérnam, et álii in oppróbrium, ut vídeant semper.

Qui autem docti fúerint fulgébunt quasi splendor firmaménti, et qui ad iustítiam erúdiunt multos, quasi stellæ in perpétuas æternitátes ». — Verbum Dómini.

Psalmus responsorius Ps 41, 2. 3. 5 bcd (*R.*: 3 a)

R. Sitívit ánima mea ad Deum vivum.

- 2 Quemádmódu(m) desíderat cervus ad fontes aquárum,
ita desíderat ánima mea ad te, Deus. *R.*

3 Sitívit ánima mea ad Deum, Deum vivum:
quando véniam et apparebo ante fáciem Dei? *R.*

5 Quóniam transíbam in locum tabernáculi admirábilis
usque ad domum Dei,
in voce exsultatiónis et confessiόνis. *R.*

7

Bene et religiose de resurrectione cogitans.

Lectio libri secúndi Machabæórum 12, 43-46

In diébus illis:

Facta collatióne, duódecim mília drachmas argénti misit Iudas, princeps Israel, Ierosólyman offérri pro peccátis mortuórum sacrificium, bene et religióse de resurrectiÓne cógitans (nisi enim eos, qui cecíderant, resurrectúros speráret, supérfluum viderétur et vanum oráre pro mórtuis), et quia considerábat quod hi, qui cum pietáte dormitiÓnem accéperant, óptimam habérent repósitam grátiam.

Sancta ergo et salúbris est cogitátió pro defúntcis exoráre, ut a peccátis solvántur. — Verbum Dómini.

Psalmus responsorius

Ps 102, 8 et 10. 13-14. 15-16. 17-18 (*R.*: Ps 36, 39 a)

R. Salus iustórum a Dómino.

8 Miserátor et miséricors Dóminus,
longánimis et multæ misericórdiæ.

10 Non secúndum peccáta nostra fecit nobis,
neque secúndum iniquitátes nostras retríbuit nobis. *R.*

13 Quómodo miserétur pater filiórum,
misértus est Dóminus timéntibus se.

- 14 Quóniam ipse cognóvit figméntum nostrum,
recordátus est quóniam pulvis sumus. *R.*
- 15 Homo sicut fenum dies eius,
tamquam flos agri sic efflorebit.
- 16 Spirat ventus in illum, et non subsístet,
et non cognóscet eum ámplius locus eius. *R.*
- 17 Misericórdia autem Dómini ab ætérno
et usque in ætérnum super timéntes eum,
et iustítia illíus in fílios filiórum;
- 18 in eos qui servant testaméntum eius,
et mémoires sunt mandatórum ipsíus ad faciéndum ea. *R.*

Lectio secunda

1

*Iustificati in sanguine ipsius, salvi erimus
ab ira per ipsum.*

Léctio Epístolæ beáti Pauli apóstoli ad Romános

Fratres:

5, 5-11

Spes non confúndit, quia cáritas Dei diffúsa est in córdibus nostris per Spíritum Sanctum, qui datus est nobis. Adhuc enim Christus, cum adhuc infírmi essémus, secúndum tempus pro ímpiis mórtuus est. Vix enim pro iusto quis móritur; nam pro bono fórsitan quis et áudeat mori.

Comméndat autem suam caritátem Deus in nos, quóniam, cum adhuc peccatóres essémus, Christus pro nobis mórtuus est.

Multo igitur magis iustificáti in sánguine ipsíus, salvi érimus ab ira per ipsum.

Si enim, cum inimíci essémus, reconciliáti sumus Deo per mortem Fílii eius, multo magis reconciliáti salvi érimus in vita ipsíus. Non solum autem, sed et gloriámur

in Deo per Dóminum nostrum Iesum Christum, per quem nunc reconciliatióem accévimus.

Verbum Dómini.

2

Ubi abundavit peccatum, superabundavit gratia.

Léctio Epístolæ beáti Pauli apóstoli ad Romános

5, 17-21

Fratres:

Si uníus delícto mors regnávít per unum, multo magis qui abundántiam grátiae et donatiónis iustítiae accípiunt, in vita regnábunt per unum Iesum Christum.

Igitur, sicut per uníus delíctum in omnes hómínes in condemnatióem, sic et per uníus iustítiam in omnes hómínes in iustificatióem vitæ.

Sicut enim per inobædiéntiam uníus hómínis, peccatóres constitúti sunt multi, ita et per uníus obæditiónem iusti constituéntur multi. Lex autem subintrávit ut abundáret delíctum.

Ubi autem abundávit peccátum, superabundávit grátia; ut, sicut regnávít peccátum in morte, ita et grátia regnet per iustítiam in vitam ætérnam, per Iesum Christum Dóminum nostrum. — Verbum Dómini.

3

*

In novitate vitæ ambulemus.

Léctio Epístolæ beáti Pauli apóstoli ad Romános 6, 3-9

Fratres:

Ignorátis quia quicúmque baptizáti sumus in Christo Iesu, in morte ipsíus baptizáti sumus? Consepúlti ergo sumus cum illo per baptísmum in mortem, ut, quem-

ádmódom suscítatus est Christus a mórtuis per glóriam Patris, ita et nos in novitáte vitæ ambulémus.

Si enim complantáti facti sumus similitúdini mortis eius, sed et resurrectiónis érimus. Hoc sciéntes quia vetus homo noster simul crucifíxus est, ut destruátur corpus peccáti, et ultra non serviámus peccáto. Qui enim mórtuus est, iustificátus est a peccáto.

Si autem mórtui sumus cum Christo, crédimus quia simul étiam vivémus cum eo, sciéntes quod Christus suscítatus ex mórtuis iam non móritur, mors illi ultra non dominátur. — Verbum Dómini.

vel brevior

Léctio Epístolæ beáti Pauli apóstoli ad Romános

6, 3-4. 8-9

Fratres:

Ignorátis quia quicúmque baptizáti sumus in Christo Iesu, in morte ipsíus baptizáti sumus? Consepúliti ergo sumus cum illo per baptismum in mortem, ut, quem ádmódom suscítatus est Christus a mórtuis per glóriam Patris, ita et nos in novitáte vitæ ambulémus.

Si autem mórtui sumus cum Christo, crédimus quia simul étiam vivémus cum eo, sciéntes quod Christus suscítatus ex mórtuis iam non móritur, mors illi ultra non dominátur. — Verbum Dómini.

4

Exspectantes redemptionem corporis nostri.

Léctio Epístolæ beáti Pauli apóstoli ad Romános

8, 14-23

Fratres:

Quicúmque Spíritu Dei agúntur, hi fílii Dei sunt.

Non enim accepistis spírítum servitútis íterum in timórem, sed accepistis Spírítum adoptiÓnis filiÓrum, in quo clamámus: « Abba, Pater ». Ipse Spírítus testimÓnium reddit una cum spírítu nostro, quod sumus filii Dei.

Si autem filii, et herédes: herédes quidem Dei, coherédes autem Christi; si tamen compátimur, ut et conglorificémur.

Exístimo enim quod non sunt condígnæ passiónes huius témporis ad futúram glóriam, quæ revelánda est in nobis. Nam exspectátió creatúráe revelatiÓnem filiÓrum Dei exspéctat.

Vanitati enim creatúra subiécta est, non volens sed propter eum qui subiécit, in spe; quia et ipsa creatúra liberábitur a servitúte corruptiÓnis in libertátem glóriæ filiÓrum Dei.

Scimus enim quod omnis creatúra congemíscit et compárturít usque adhuc. Non solum autem, sed et nos ipsi primítias Spírítus habéntes, et ipsi intra nos gé-mimus adoptiÓnem filiÓrum exspectántes, redemptiÓnem córporis nostri.

Verbum Dómini.

5

Quis nos separabit a caritate Christi?

Léctio Epístolæ beáti Pauli apóstoli ad Romános

8, 31 b-35. 37-39

Fratres:

Si Deus pro nobis, quis contra nos? Qui Fílio suo non pepércit, sed pro nobis ómnibus trádídít illum, quómodo non étiam cum illo ómnia nobis donábit?

Quis accusábit advérsus eléctos Dei? Deus qui iustificat. Quis est qui condémnet? Christus Iesus, qui mórtuus est, immo qui suscitátus est, qui et est ad dexteram Dei, qui étiam interpéllat pro nobis.

Quis nos separábit a caritaté Christi? tribulátio, an angústia, an persecútio, an fames, an núditas, an perículum, an gládius?

Sed in his ómnibus supervíncimus per eum qui diléxit nos. Certus sum enim quia neque mors neque vita, neque ángeli neque principátus, neque instántia neque futúra, neque virtútes, neque altitúdo neque profúndum, neque ália quáelibet creatúra póterit nos separáre a caritaté Dei, quæ est in Christo Iesu Dómino nostro. — Verbum Dómini.

6

Sive vivimus sive morimur, Domini sumus.

Léctio Epístolæ beáti Pauli apóstoli ad Romános

14, 7-9. 10 b-12

Fratres:

Nemo nostrum sibi vivit, et nemo sibi móritur. Sive enim vívimus, Dómino vívimus; sive mórimur, Dómino mórimur: sive ergo vívimus sive mórimur, Dómini sumus. In hoc enim Christus et mórtuus est et vixit, ut et mortuórum et vivórum dominétur.

Omnes stábitus ante tribúnal Dei. Scriptum est enim: « Vivo ego, dicit Dóminus, mihi flectétur omne genu, et omnis lingua confitébitur Deo ».

Itaque unusquisque nostrum pro se ratiónem reddet Deo. — Verbum Dómini.

7

*

In Christo omnes vivificabuntur.

Lectio Epistolæ primæ beāti Pauli apóstoli

ad Corínthios

15, 20-24 a. 25-28

Fratres:

Nunc Christus resurrexit a mórtuis, primítiæ dormiéntium; quóniam enim per hóminem mors, et per hóminem resurrectio mortuórum.

Sicut enim in Adam omnes moriúntur, ita et in Christo omnes vivificabúntur. Unusquisque autem in suo órdine: primítiæ Christus, deínde hi qui sunt Christi in advéntu eius. Deínde finis, cum tradíderit Regnum Deo et Patri.

Opórtet autem illum regnáre, « donec ponat omnes inimícos sub pédibus eius ». Novíssima autem inimíca destruétur mors; « ómnia enim subiécit sub pédibus eius ».

Cum autem dicat: « Omnia subiécta sunt », sine dúbio præter eum qui subiécit ei ómnia. Cum autem subiécta fúerint illi ómnia, tunc ipse Fílius subiéctus erit illi, qui sibi subiécit ómnia, ut sit Deus ómnia in ómnibus. — Verbum Dómini.

vel brevior

Lectio Epistolæ primæ beāti Pauli apóstoli

ad Corínthios

15, 20-23

Fratres:

Nunc Christus resurrexit a mórtuis, primítiæ dormiéntium; quóniam enim per hóminem mors, et per hóminem resurrectio mortuórum.

Sicut enim in Adam omnes moriúntur, ita et in Christo omnes vivificabúntur. Unusquisque autem in

suo ordine: primitiæ Christus, deinde hi qui sunt Christi in advéntu eius. — Verbum Dómini.

8

Absorpta est mors in victoria.

Léctio Epístolæ primæ beáti Pauli apóstoli
ad Corínthios 15, 51-57

Fratres:

Ecce mystérium vobis dico: Non omnes quidem dormiémus, sed omnes immutábimur.

In mométo, in ictu óculi, in novíssima tuba; canet enim, et mórtui suscitabúntur incorrúpti, et nos immutábimur. Opórtet enim corruptibile hoc indúere incorruptélam, et mortále indúere immortalitátem.

Cum autem corruptibile hoc indúerit incorruptélam, et mortále hoc indúerit immortalitátem, tunc fiet sermo qui scriptus est: « Absórpta est mors in victória. Ubi est, mors, victória tua? ubi est, mors, stímulus tuus? »

Stímulus autem mortis peccátum est, virtus vero peccáti Lex. Deo autem grátias, qui dedit nobis victóriam per Dóminum nostrum Iesum Christum.

Verbum Dómini.

9

*Quæ videntur, temporalia sunt;
quæ autem non videntur, æterna sunt.*

Léctio Epístolæ secúndæ beáti Pauli apóstoli
ad Corínthios 4, 14 — 5, 1

Fratres:

Scimus quóniam qui suscitávit Dóminum Iesum,

et nos cum Iesu suscitábit, et constitúet vobíscum. Omnia enim propter vos, ut grátia, abúndans per multos, gratiárum actiόνem abundáre fáciat in glóriam Dei.

Propter quod non defícimus; sed, licet is qui foris est noster homo corrúmpitur, tamen is qui intus est noster renovátur de die in diem. Id enim, quod in præsénti est leve tribulatiónis nostræ, supra modum in sublimitátem ætérnum glóriæ pondus operátur nobis, non contemplántibus nobis quæ vidéntur, sed quæ non vidéntur: quæ enim vidéntur temporália sunt quæ autem non vidéntur æténa sunt.

Scimus enim quóniam, si terréstris domus nostra huius tabernáculi dissolvátur, ædificatióem ex Deo habémus, domum non manufáctam, ætérnam in cælis. — Verbum Dómini.

10

Habemus domum æternam in cælis.

Léctio Epístolæ secúndæ beáti Pauli apóstoli
ad Corínthios

5, 1. 6-10

Fratres:

Scimus quóniam, si terréstris domus nostra huius tabernáculi dissolvátur, ædificatióem ex Deo habémus, domum non manufáctam, ætérnam in cælis.

Audéntes ígitur semper, et sciéntes quóniam, dum præséntes sumus in córpore, peregrinámur a Dómino (per fidem enim ambulámus et non per spéciem), audémus autem et bonam voluntátem habémus magis peregrinári a córpore et præséntes esse ad Dóminum. Et ídeo conténdimus, sive præséntes sive abséntes, placére illi.

Omnes enim nos manifestári oportet ante tribúnal Christi, ut réferat unusquisque pro eis quæ per corpus gessit, sive bonum sive malum. — Verbum Dómini.

11

*Transfigurabit corpus humilitatis nostræ,
conforme fieri corpori gloriæ suæ.*

Léctio Epístolæ beáti Pauli apóstoli ad Philippénes

3, 20-21

Fratres:

Noster municipátus in cælis est, unde étiam Salvatórem exspectámus Dóminum Iesum Christum, qui transfigurábit corpus humilitátis nostræ, confórme fieri córpori glóriæ suæ, secúndum operatióem, qua possit étiam subícere sibi ómnia. — Verbum Dómini.

12

Semper cum Domino erimus.

Léctio Epístolæ primæ beáti Pauli apóstoli

ad Thessalonicénes

4, 13-14. 17 b-18

Nólumus vos ignoráre, fratres, de dormiéntibus, ut non contristémini, sicut et céteri qui spem non habent.

Si enim crédimus quod Iesus mórtuus est et resurréxit, ita et Deus eos qui dormiérunt per Iesum addúcet cum eo.

Et sic semper cum Dómino érimus. Itaque consolámini ínvicem in verbis istis.

Verbum Dómini.

13

Si commortui sumus, et convivemus.

Léctio Epístolæ secúndæ beáti Pauli apóstoli
ad Timótheum 2, 8-13

Caríssime:

Memor esto Iesum Christum resuscitátum esse a mórtuis, ex sémine David, secúndum Evangélium meum, in quo labóro usque ad víncula quasi male óperans; sed verbum Dei non est alligátum. Ideo ómnia sustíneo propter eléctos, ut et ipsi salútem consequántur, quæ est in Christo Iesu, cum glória ætérna.

Fidélis sermo; nam, si commórtui sumus, et convivémus; si sustinémus, et conregnábimus; si negábimus, et ille negábit nos; si non crédimus, ille fidélis manet: negáre enim seípsum non potest.

Verbum Dómini.

14

Videbimus eum sicuti est.

Léctio Epístolæ primæ beáti Ioánnis apóstoli 3, 1-2

Caríssimi:

Vidéte qualem caritátem dedit nobis Pater, ut filii Dei nominémur: et sumus! Propter hoc mundus non cognóscit nos, quia non cognóvit eum.

Caríssimi, nunc filii Dei sumus, et nondum manifestum est quid érimus. Scimus quóniam, cum ipse apparúerit, símiles ei érimus; quóniam vidébimus eum sicuti est. — Verbum Dómini.

15

*Transivimus de morte in vitam,
quoniam diligimus fratres.*

Léctio Epístolæ primæ beáti Ioánnis apóstoli 3, 14-16

Caríssimi:

Nos scimus quóniam transivimus de morte in vitam, quóniam diligimus fratres. Qui non diligit manet in morte. Omnis qui odit fratrem suum homicída est, et scitis quóniam omnis homicída non habet vitam ætérnam in se manéntem.

In hoc nóvimus caritátem: quóniam ille pro nobis ánimam suam pósuit, et nos debémus pro frátribus ánimas pónere. — Verbum Dómini.

Evangelium

1

Alleluia

Mt 25, 34

℞. Allelúia. ℣. Veníte, benedícti Patris mei,
dicit Dóminus;
possidéte parátum vobis Regnum
a constitutióne mundi. ℞. Allelúia.

*Gaudete et exsultate, quoniam merces vestra
copiosa est in cælis.*

✠ Léctio sancti Evangélii secúndum Matthæum

5, 1-12 a

In illo témpore:

Videns Iesus turbas ascéndit in montem, et, cum

sedisset, accesserunt ad eum discipuli eius, et apériens os suum docébat eos dicens:

« Beáti páuperes spíritu, quóniam ipsórum est Regnum cælórum.

Beáti qui lugent, quóniam ipsi consolabúntur.

Beáti mites, quóniam ipsi possidébunt terram.

Beáti qui esúriunt et sítiunt iustítiam, quóniam ipsi saturabúntur.

Beáti misericórdes, quia ipsi misericórdiam consequéntur.

Beáti mundo corde, quóniam ipsi Deum vidébunt.

Beáti pacífici, quóniam filii Dei vocabúntur.

Beáti qui persecutiónem patiúntur propter iustítiam, quóniam ipsórum est Regnum cælórum.

Beáti estis, cum maledíxerint vobis, et persecúti vos fuerint, et díxerint omne malum advérsus vos, mentiéntes, propter me: gaudéte et exultáte, quóniam merces vestra copiósa est in cælis ».

Verbum Dómini.

2

Alleluia

Cf. Mt 11, 25

℟. Allelúia. ʒ. Benedictus es, Pater,
Dómine cæli et terræ,
quia mystéria Regni párvulis revelásti.
℟. Allelúia.

Venite ad me, ... et ego reficiam vos.

✠ Lécio sancti Evangélii secúndum Matthæum

11, 25-30

In illo témpore, respóndens Iesus dixit: « Confíteor tibi, Pater, Dómine cæli et terræ, quia abscondísti hæc a sapiéntibus et prudéntibus, et revelásti ea párvulis.

Ita, Pater, quóniam sic fuit plácitum ante te. Omnia mihi trá dita sunt a Patre meo; et nemo novit Fílium, nisi Pater; neque Patrem quis novit, nisi Fílius, et cui volúerit Fílius reveláre.

Veníte ad me, omnes qui laborátis et oneráti estis, et ego reficiam vos.

Tóllite iugum meum super vos, et díscite a me quia mitis sum et húmilis corde; et “ inveniétis réquiem animábus vestris ”; iugum enim meum suáve, et onus meum leve est ». — Verbum Dómini.

3

Alleluia

Phil 3, 20

℞. Allelúia. √. Conversátio nostra in cælis est,
unde étiam Salvatórem exspectámus,
Dóminum nostrum Iesum Christum.

℞. Allelúia.

Ecce Sponsus, exite obviam ei.

✠ Léctio sancti Evangélii secúndum Matthæum

25, 1-13

In illo témpore:

Dixit Iesus discipulis suis parábolam hanc: « Sí-mile erit Regnum cælórum decem virgínibus, quæ, accipiéntes lámpades suas, exiérunt óbviám sponso. Quinque autem ex eis erant fátuæ et quinque prudéntes; fátuæ enim accéptis lampádibus suis non sump-sérunt óleum secum; prudéntes vero accepérunt óleum in vasis cum lampádibus suis.

Moram autem faciénte sponso, dormitavérunt omnes et dormiérunt.

Média autem nocte clamor factus est: "Ecce sponsus, exíte óbviã ei". Tunc surrexérunt omnes vírgines illæ et ornavérunt lámpades suas.

Fátuæ autem sapiéntibus dixerunt: "Date nobis de óleo vestro, quia lámpades nostræ exstinguúntur".

Respondérunt prudéntes dicéntes: "Ne forte non sufficiat nobis et vobis, ite pótius ad vendéntes et émite vobis".

Dum autem irent émere, venit sponsus, et quæ parátæ erant intravérunt cum eo ad núptias, et clausa est iánua.

Novíssime autem véniunt et réliquæ vírgines dicéntes: "Dómine, Dómine, áperi nobis". At ille respóndens ait: "Amen dico vobis, néschio vos".

Vigiláte itaque, quia nescítis diem neque horam ».

Verbum Dómini.

4

Alleluia

Mt 25, 34

℞. Allelúia. √. Veníte, benedícti Patris mei,
dicit Dóminus;
possidéte parátum vobis Regnum
a constitutióne mundi. ℞. Allelúia.

Venite, benedicti Patris mei.

✠ Lécio sancti Evangéllii secúndum Mattháeum

25, 31-46

In illo témpore:

Dixit Iesus discíplis suis: « Cum vénerit Fílius hóminis in glória sua, et omnes ángeli cum eo, tunc sedébit super thronum glóriæ suæ. Et congregabúntur ante eum omnes gentes; et separábit eos ab ínvicem,

sicut pastor ségregat oves ab hædis, et státuet oves quidem a dextris suis, hædos autem a sinístris.

Tunc dicet Rex his qui a dextris eius erunt: " Veníte, benedícti Patris mei, possidéte parátum vobis Regnum a constitutióne mundi. Esurívi enim, et dedístis mihi manducáre; sitívi, et dedístis mihi bíbere; hospes eram, et collegístis me; nudus, et operuístis me; infirmus, et visitástis me; in cárcere eram, et venístis ad me " .

Tunc respondébunt ei iusti dicétes: " Dómine, quando te vídimus esuriéntem et pávimus, aut sitiéntem et dédimus tibi potum? quando autem te vídimus hóspitem et collégimus, aut nudum et cooperúimus? quando autem te vídimus infirmum aut in cárcere et vénimus ad te? "

Et respóndens Rex dicet illis: " Amen dico vobis, quámdiu fecístis uni de his frátribus meis mínimis, mihi fecístis " .

Tunc dicet et his qui a sinístris erunt: " Discédite a me, maledícti, in ignem ætérnum, qui præparátus est diabolo et ángelis eius. Esurívi enim, et non dedístis mihi manducáre; sitívi, et non dedístis mihi potum; hospes eram, et non collegístis me; nudus, et non operuístis me; infirmus et in cárcere, et non visitástis me " .

Tunc respondébunt et ipsi dicétes: " Dómine, quando te vídimus esuriéntem aut sitiéntem aut hóspitem aut nudum aut infirmum vel in cárcere, et non ministrávimus tibi? "

Tunc respóndebit illis dicens: " Amen dico vobis, quámdiu non fecístis uni de mínimis his, nec mihi fecístis " .

Et ibunt hi in supplicium ætérnum, iusti autem in vitam ætérnam ». — Verbum Dómini.

Alleluia

Io 11, 25 a

℞. Allelúia. ⁊. Ego sum resurrectio et vita,
dicit Dóminus;
qui credit in me,
non moriétur in ætérnum.

℞. Allelúia.

Adulescens, tibi dico: surge.

✠ Lécitio sancti Evangélii secúndum Lucam 7, 11-17

In illo témpore:

Abiit Iesus in civitátem, quæ vocátur Naim, et ibant cum illo discipuli eius et turba copiósa.

Cum autem appropinquáret portæ civitátis, ecce defúnctus efferebátur fílius únicus matris suæ; et hæc vídua erat, et turba civitátis multa cum illa.

Quam cum vidísset Dóminus, misericórdia motus super ea, dixit illi: « Noli flere ».

Et accéssit et tétigit lóculum. Hi autem qui portábant stetérunt.

Et ait: « Aduléscens, tibi dico: surge ». Et resédit qui erat mórtuus; et cœpit loqui, et dedit illum matri suæ.

Accépit autem omnes timor, et magnificábant Deum dicéntes: « Prophéta magnus surréxit in nobis » et « Deus visitávit plebem suam ». Et éxiit hic sermo in univérsam Iudæam de eo, et omnem circa regiónem.

Verbum Dómini.

Alleluia

Phil 3, 20

℞. Allelúia. ʒ. Conversátio nostra in cælis est,
unde étiam Salvatórem exspectámus,
Dóminum nostrum Iesum Christum.
℞. Allelúia.

Et vos estote parati.

✠ Léctio sancti Evangéllii secúndum Lucam 12, 35-40

In illo témpore:

Dixit Iesus discípulis suis: « Sint lumbi vestri præcincti, et lucérnæ ardéntes, et vos símiles homínibus exspectántibus dóminum suum, quando revertátur a núptiis; ut, cum vénerit et pulsáverit, conféstim apé-riant ei.

Beáti servi illi, quos, cum vénerit dóminus, invénerit vigilántes; amen dico vobis, quod præcinget se, et fáciat illos discumbere, et tránsiens ministrábit illis.

Et si vénerit in secúnda vigília, et si in tértia vigília vénerit, et ita invénerit, beáti sunt illi. Hoc autem scitóte quia, si sciret paterfamílias qua hora fur veníret, non síneret perfodíri domum suam.

Et vos estóte paráti, quia qua hora non putátis Fílius hóminis venit ». — Verbum Dómini.

Alleluia

Ap 14, 13

℞. Allelúia. ʒ. Beáti mórtui, qui in Dómino moriúntur: requiéscant a labóribus suis;
ópera enim illórum sequúntur illos.
℞. Allelúia.

Hodie mecum eris in paradiso.

✠ Lécio sancti Evangélii secúndum Lucam

23, 33. 39-43

Postquam venérunt mílites in locum qui vocátur Calváriæ, ibi crucifixerunt Iesum et latrónes, unum a dextris et álterum a sinístris.

Unus autem de his qui pendébant latrónibus blasphemábat eum dicens: « Nonne tu es Christus? salvum fac temetípsum et nos ».

Respóndens autem alter increpábat illum, dicens: « Neque tu times Deum, quod in eádem damnatióne es? Et nos quidem iuste, nam digna factis recípiamus; hic vero nihil mali gessit ».

Et dicébat: « Iesu, meménto mei cum véneris in Regnum tuum ».

Et dixit illi Iesus: « Amen dico tibi: Hódie mecum eris in paradíso ». — Verbum Dómini.

8

Alleluia

Ap 1, 5-6

℞. Allelúia. √. Iesus Christus
est primogénitus mortuórum;
ipsi glória et impérium
in sæcula sæculórum. Amen.
℞. Allelúia.

* *Pater, in manus tuas commendo spiritum meum.*

✠ Lécio sancti Evangélii secúndum Lucam

23, 44-46. 50. 52-53; 24, 1-6 a

Erat fere hora sexta, et ténebræ factæ sunt in uni-

vérsa terra usque in horam nonam. Et obscurátus est sol, et velum templi scissum est médium.

Et clamans voce magna Iesus ait: « Pater, in manus tuas comméndo spíritum meum ». Et hæc dicens exspirávit.

Et ecce vir, nómine Ioseph, qui erat decúrio, vir bonus et iustus, accéssit ad Pilátum et pétiit corpus Iesu; et depósitum invólvit síndone et pósuit eum in monuménto excíso, in quo nondum quisquam pósitus fúerat.

Prima autem sabbatórum, valde dilúculo, venérunt mulieres ad monuméntum, portántes quæ paráverant arómata, et invenérunt lápidem revolútum a monuménto. Et ingressæ non invenérunt corpus Dómini Iesu.

Et factum est, dum mente hæsitárent de isto, ecce duo viri stetérunt secus illas in veste fulgénti.

Cum timérent autem et declinárent vultum in terram, dixerunt ad illas: « Quid quæritis vivéntem cum mórtuis? Non est hic, sed surréxit ».

Verbum Dómini.

vel brevior

✠ Lécitio sancti Evangélii secúndum Lucam

23, 44-46. 50. 52-53

Erat fere hora sexta, et ténebræ factæ sunt in univérsa terra usque in horam nonam. Et obscurátus est sol, et velum templi scissum est médium.

Et clamans voce magna Iesus ait: « Pater, in manus tuas comméndo spíritum meum ». Et hæc dicens exspirávit.

Et ecce vir, nómine Ioseph, qui erat decúrio, vir

bonus et iustus, accessit ad Pilátum et pétiit corpus Iesu; et depósitum invólvit síndone et pósuit eum in monumento excíso, in quo nondum quisquam pósitus fúerat. — Verbum Dómini.

9

Alleluia

Io 3, 16

℞. Allelúia. ⁊. Sic Deus diléxit mundum
ut Fílium suum unigénitum daret;
omnis qui credit in eum
habet vitam ætérrnam.

℞. Allelúia.

* *Nonne hæc oportuit pati Christum,
et intrare in gloriam suam?*

✠ Lécitio sancti Evangélli secúndum Lucam 24, 13-35

Ecce duo ex discípulis Iesu ibant ipsa die prima sábbati in castéllum, quod erat in spátio stadiórum sexagínta ab Ierúsalem, nómine Emmaus. Et ipsi loquebántur ad ínicem de his ómnibus quæ accíderant. Et factum est, dum fabularéntur et secum quærerent, et ipse Iesus appropínquans ibat cum illis; óculi autem illórum tenebántur, ne eum agnóscerent.

Et ait ad illos: « Qui sunt hi sermónes, quos confértis ad ínicem ambulántes? » Et stetérunt tristes.

Et respóndens unus, cui nomen Cléopas, dixit ei: « Tu solus peregrínus es in Ierúsalem, et non cognovísti quæ facta sunt in illa his diébus? »

Quibus ille dixit: « Quæ? »

Et illi dixerunt ei: « De Iesu Nazaréno, qui fuit vir prophéta, potens in ópere et sermóne coram Deo et omni pópulo, et quómo do eum tradiderunt summi sacerdótes et príncipes nostri in damnatió nem mortis, et crucifixerunt eum.

Nos autem sperabá mus quia ipse esset redemptúrus Israel; at nunc super hæc ómnia tértia dies hódie quod hæc facta sunt.

Sed et mulieres quædam ex nostris terruerunt nos; quæ ante lucem fuerunt ad monuméntum et, non invénto corpore eius, venerunt dicétes se étiam visió nem angelórum vidísse, qui dicunt eum vívere. Et abiérunt quidam ex nostris ad monuméntum, et ita invenérunt sicut mulieres dixerunt, ipsum vero non vidérunt ».

Et ipse dixit ad eos: « O stulti et tardi corde ad credéndum in ómnibus quæ locúti sunt prophéta! Nonne hæc opórtuit pati Christum, et intráre in glóriam suam? »

Et incípiens a Móyse et ómnibus prophétis, interpretabá tur illis in ómnibus Scriptúris, quæ de ipso erant.

Et appropinquavérunt castéllo quo ibant, et ipse se finxit lóngius ire. Et coegerunt illum dicétes: « Mane nobíscum, quóniam advesperáscit, et inclináta est iam dies ». Et intrávit ut manéret cum illis.

Et factum est, dum recumberet cum illis, accépit panem, et benedíxit ac fregit, et porrigébat illis. Et apérti sunt óculi eórum, et cognovérunt eum; et ipse evánuít ab eis.

Et dixerunt ad ínvicem: « Nonne cor nostrum ardens erat in nobis dum loquerétur in via et aperíret nobis Scriptúras? » Et surgétes eádem hora regréssi sunt in Ierúsalem; et invenérunt congregátos Undecim et eos qui cum ipsis erant, dicétes: « Surréxit Dóminus vere et apparúit Simóni ».

Et ipsi narrábant quæ gesta erant in via, et quómo cognovérunt eum in fractióne panis.

Verbum Dómini.

vel brevior

✠ Lécitio sancti Evangéllii secúndum Lucam

24, 13-16. 28-35

Ecce duo ex discíplis Iesu ibant ipsa die prima sábbati in castéllum, quod erat in spátio stadiórum sexagínta ab Ierúsalem, nómine Emmaus. Et ipsi loquebántur ad ínvicem de his ómnibus quæ accíderant. Et factum est, dum fabularéntur et secum quærerent, et ipse Iesus appropínquans ibat cum illis; óculi autem illórum tenebántur, ne eum agnóscerent.

Et appropinquavérunt castélló quo ibant, et ipse se finxit lóngius ire. Et coegerunt illum dicétes: « Mane nobíscum, quóniam advesperáscit, et inclináta est iam dies ». Et intrávit ut manéret cum illis.

Et factum est, dum recumberet cum illis, accépit panem, et benedíxit ac fregit, et porrigébat illis. Et apérti sunt óculi eórum, et cognovérunt eum; et ipse evánuit ab eis.

Et dixérunt ad ínvicem: « Nonne cor nostrum ardens erat in nobis dum loquerétur in via et aperíret nobis Scriptúras? » Et surgétes eádem hora regréssi sunt in Ierúsalem; et invenérunt congregátos Undecim et eos qui cum ipsis erant, dicétes: « Surréxit Dóminus vere et appáruit Simóni ».

Et ipsi narrábant quæ gesta erant in via, et quómo cognovérunt eum in fractióne panis.

Verbum Dómini.

Alleluia

Mt 25, 34

℞. Allelúia. γ. Veníte, benedícti Patris mei,
dicit Dóminus;
possidéte parátum vobis Regnum
a constitutióne mundi. ℞. Allelúia.

*Qui verbum meum audit et credit,
... transiit a morte in vitam.*

✠ Lécio sancti Evangélii secúndum Ioánnem 5, 24-29

In illo témpore:

Respóndit Iesus Iudáeis: « Amen, amen dico vobis: Qui verbum meum audit, et credit ei qui misit me, habet vitam ætérrnam, et in iudícium non venit, sed tránsiit a morte in vitam.

Amen, amen dico vobis: Venit hora, et nunc est, quando mórtui áudient vocem Fílii Dei, et qui audierint vivent. Sicut enim Pater habet vitam in semetípso, sic dedit et Fílio vitam habére in semetípso, et potestátem dedit ei iudícium fácere, quia Fílius hóminis est.

Nolíte mirári hoc, quia venit hora, in qua omnes qui in monuméntis sunt, áudient vocem eius; et procédent qui bona fecérunt in resurrectiόνem vitæ, qui vero mala egerunt in resurrectiόνem iudícii ». — Verbum Dómini.

Alleluia

Io 6, 39

℞. Allelúia. γ. Hæc est volúntas Patris mei,
ut omne, quod dedit mihi,
non perdam ex eo,
sed resúscitem illud in novíssimo die,
dicit Dóminus. ℞. Allelúia.

*Qui credit in Filium habet vitam æternam,
et resuscitabo ego eum in novissimo die.*

✠ Lécitio sancti Evangélii secúndum Ioánnem 6, 37-40

In illo témpore:

Dixit Iesus turbis: « Omne, quod dat mihi Pater, ad me véniet; et eum, qui venit ad me, non eíciam foras. Quia descéndi de cælo, non ut fáciam voluntátem meam, sed voluntátem eius qui misit me. Hæc est autem volúntas eius, qui misit me, ut omne quod dedit mihi non perdam ex eo, sed resúscitem illud in novíssimo die.

Hæc est enim volúntas Patris mei, ut omnis qui videt Fílium et credit in eum, hábeat vitam ætérnam; et resuscitábo ego eum in novíssimo die ».

Verbum Dómini.

12

Alleluia

Io 6, 51-52

℞. Allelúia. √. Ego sum panis vivus,
qui de cælo descéndi, dicit Dóminus;
si quis manducáverit ex hoc pane,
vivet in ætérnum. ℞. Allelúia.

*Qui manducat hunc panem habet vitam æternam,
et ego resuscitabo eum in novissimo die.*

✠ Lécitio sancti Evangélii secúndum Ioánnem 6, 51-59

In illo témpore:

Dixit Iesus turbis: « Ego sum panis vivus, qui de cælo descéndi. Si quis manducáverit ex hoc pane, vivet in ætérnum, panis autem quem ego dabo, caro mea est pro mundi vita ».

Litigábant ergo Iudæi ad ínvicem dicéntes: « Quómodo potest hic nobis carnem suam dare ad manducándum? »

Dixit ergo eis Iesus: « Amen, amen dico vobis: Nisi manducavéritis carnem Fílii hóminis et bibéritis eius sánguinem, non habéitis vitam in vobismetípsis.

Qui mandúcat meam carnem et bibit meum sánguinem habet vitam ætéram, et ego resuscitábo eum in novíssimo die.

Caro enim mea verus est cibus, et sanguis meus verus est potus. Qui mandúcat meam carnem et bibit meum sánguinem in me manet, et ego in illo. Sicut misit me vivens Pater, et ego vivo propter Patrem, et qui mandúcat me, et ipse vivet propter me.

Hic est panis qui de cælo descéndit. Non sicut manducavérunt patres et mórtui sunt.

Qui mandúcat hunc panem vivet in ætérum ».
Verbum Dómini.

13

Alleluia

Io 11, 25 a. 26

℞. Allelúia. ℣. Ego sum resurréctio et vita,
dicit Dóminus;
qui credit in me, non moriétur in ætérum.
℞. Allelúia.

*

Ego sum resurrectio et vita.

✠ Lécitio sancti Evangélii secúndum Ioánnem

11, 17-27

In illo témpore:

Venit Iesus Bethániam, et invénit Lázarus quáttuor dies iam in monuménto habéntem. Erat autem Be-

thánia iuxta Hierosólymam quasi stádiis quíndecim. Multi autem ex Iudáeis vénerant ad Martham et Mariám, ut consolaréntur eas de fratre.

Martha ergo, ut audívit quia Iesus venit, occúrrit illi; Mariá autem domi sedébat.

Dixit ergo Martha ad Iesum: « Dómine, si fuísses hic, frater meus non esset mórtuus; sed et nunc scio quia quæcúmque popósceris a Deo dabit tibi Deus ».

Dicit illi Iesus: « Resúrget frater tuus ».

Dicit ei Martha: « Scio quia resúrget in resurrectione, in novíssimo die ».

Dixit ei Iesus: « Ego sum resurréctio et vita; qui credit in me, et si mórtuus fúerit, vivet, et omnis qui vivit et credit in me non moriétur in ætérnum. Cre-dis hoc? »

Ait illi: « Utique, Dómine; ego crédidi quia tu es Christus Fílius Dei, qui in mundum venísti ».

Verbum Dómini.

vel brevior

✠ Lécitio sancti Evangélli secúndum Ioánnem

11, 21-27

In illo témpore:

Dixit Martha ad Iesum: « Dómine, si fuísses hic, frater meus non esset mórtuus; sed et nunc scio quia quæcúmque popósceris a Deo, dabit tibi Deus ».

Dicit illi Iesus: « Resúrget frater tuus ».

Dicit ei Martha: « Scio quia resúrget in resurrectione, in novíssimo die ».

Dixit ei Iesus: « Ego sum resurréctio et vita; qui credit in me, et si mórtuus fúerit, vivet, et omnis qui vivit et credit in me non moriétur in ætérnum. Cre-dis hoc? »

Ait illi: « Utique, Dómine; ego crédidi quia tu es
Christus Fílius Dei, qui in mundum venísti ».
Verbum Dómini.

14

Alleluia

Io 3, 16

℞. Allelúia. γ. Sic Deus diléxit mundum
ut Fílium suum unigénitum daret;
omnis qui credit in eum
habet vitam ætérmam. ℞. Allelúia.

Lazare, veni foras.

✠ Lécio sancti Evangéllii secúndum Ioánnem

11, 32-45

In illo témpore:

Cum venísset María, soror Lázari, ubi erat Iesus, vi-
dens eum cécidit ad pedes eius, dicens ei: « Dómine, si
fuísses hic, non esset mórtuus frater meus ».

Iesus ergo, ut vidit eam plorántem et Iudæos, qui
vénerant cum ea, plorántes, frémit spírítu et turbávit
seípsum, et dixit: « Ubi posuístis eum? »

Dicunt ei: « Dómine, veni et vide ». Lacrimátus est
Iesus.

Dicébant ergo Iudæi: « Ecce quómo do amábat
eum! »

Quidam autem dixérunt ex ipsis: « Non póterat hic,
qui apéruit óculos cæci, fácere ut et hic non moreré-
tur? »

Iesus ergo rursus fremens in semetípso venit ad
monuméntum. Erat autem spelúnca, et lapis superpósi-
tus erat ei.

Ait Iesus: « Tóllite lápidem ». Dicit ei Martha, so-

ror eius qui mórtuus fúerat: « Dómine, iam fetet, quadriduánuus enim est ».

Dicit ei Iesus: « Nonne dixi tibi quóniam, si crederis, vidébis glóriam Dei? »

Tulérunt ergo lápidem; Iesus autem, elevátis sursum óculis, dixit: « Pater, grátias ago tibi quóniam audísti me. Ego autem sciébam quia semper me audis; sed propter pópulum, qui circúmstat, dixi, ut credant quia tu me misísti ».

Et hæc cum dixisset, voce magna clamávit: « Lázare, veni foras ». Pródiit qui fúerat mórtuus ligátus pedes et manus ínstitis, et fácies illíus sudário erat ligáta.

Dicit Iesus eis: « Sólvite eum et sínite eum abíre ».

Multi ergo ex Iudáeis, qui vénerant ad Mariám et víderant quæ fecit, credidérunt in eum.

Verbum Dómini.

15

Alleluia

Ap 14, 13

℞. Allelúia. √. Beáti mórtui, qui in Dómino moriúntur: requiéscant a labóribus suis; ópera enim illórum sequúntur illos.

℞. Allelúia.

*

*Si granum frumenti mortuum fuerit,
multum fructum affert.*

✠ Léctio sancti Evangélii secúndum Ioánnem

12, 23-28

In illo témpore:

Dixit Iesus discípulis suis: « Venit hora ut glori-

ficétur Fílius hóminis. Amen, amen dico vobis: Nisi granum fruménti cadens in terram mórtuum fúerit, ipsum solum manet; si autem mórtuum fúerit, multum fructum affert.

Qui amat ánimam suam perdit eam, et qui odit ánimam suam in hoc mundo, in vitam ætérnam custódiat eam. Si quis mihi minístrat, me sequátur; et, ubi sum ego, illic et miníster meus erit. Si quis mihi ministráverit, honorificábit eum Pater.

Nunc ánima mea turbáta est. Et quid dicam? Pater, salvífica me ex hora hac? Sed proptérea veni in horam hanc. Pater, glorífica tuum Nomen ».

Venit ergo vox de cælo: « Et glorificávi, et íterum glorificábo ». — Verbum Dómini.

vel brevior

✠ Lécitio sancti Evangélii secúndum Ioánnem

12, 23-26

In illo témpore:

Dixit Iesus discíplis suis: « Venit hora ut glorificétur Fílius hóminis. Amen, amen dico vobis: Nisi granum fruménti cadens in terram mórtuum fúerit, ipsum solum manet; si autem mórtuum fúerit, multum fructum affert.

Qui amat ánimam suam perdit eam, et qui odit ánimam suam in hoc mundo, in vitam ætérnam custódiat eam. Si quis mihi minístrat, me sequátur; et, ubi sum ego, illic et miníster meus erit. Si quis mihi ministráverit, honorificábit eum Pater.

Verbum Dómini.

16

Alleluia

Io 6, 40

℞. Allelúia. ⁊. Hæc est volúntas Patris mei,
 ut omnis qui credit in me
 hábeat vitam ætérnam,
 et ego resuscitábo eum in novíssimo die,
 dicit Dóminus. ℞. Allelúia.

In domo Patris mei mansiones multæ sunt.

✠ Lécitio sancti Evangéllii secúndum Ioánnem 14, 1-6

In illo témpore:

Dixit Iesus discíplis suis: « Non turbétur cor vestrum. Créditis in Deum, et in me créдите. In domo Patris mei mansiónes multæ sunt. Si quo minus dixísem vobis, quia vado paráre vobis locum?

Et, si abíero et præparávero vobis locum, íterum vénio et accípiam vos ad meípsum, ut, ubi sum ego, et vos sitis. Et quo ego vado, scitis viam ».

Dicit ei Thomas: « Dómine, nescímus quo vadis, et quómodo póssumus viam scire? »

Dicit ei Iesus: « Ego sum via et véritas et vita. Nemo venit ad Patrem, nisi per me ». — Verbum Dómini.

17

Alleluia

Io 6, 39

℞. Allelúia. ⁊. Hæc est volúntas Patris mei,
 ut omne, quod dedit mihi,
 non perdam ex eo,
 sed resúscitem illud in novíssimo die,
 dicit Dóminus. ℞. Allelúia.

Volo ut, ubi ego sum, et illi sint mecum.

✠ Lécitio sancti Evangélii secúndum Ioánnem

17, 24-26

In illo témpore:

Sublevátis Iesus óculis in cælum, orávit dicens: « Pater, quod dedísti mihi, volo ut, ubi ego sum, et illi sint mecum, ut vídeant glóriam meam, quam dedísti mihi; quia dilexísti me ante constitútionem mundi.

Pater iuste, et mundus te non cognóvit; ego autem te cognóvi, et hi cognovérunt quia tu me misísti. Et notum feci eis Nomen tuum et notum fáciam, ut dilécitio, qua dilexísti me, in ipsis sit, et ego in ipsis ».

Verbum Dómini.

18

Alleluia

Io 11, 25 a. 26

℞. Allelúia. √. Ego sum resurrectio et vita,
dicit Dóminus;
qui credit in me, non moriétur in ætérnum.
℞. Allelúia.

Inclinato capite, tradidit spiritum.

✠ Lécitio sancti Evangélii secúndum Ioánnem

19, 17-18. 25-30

In illo témpore:

Báiulans sibi crucem, exívit Iesus in eum qui dicitur Calváriæ locum, quod hebráice dicitur Gólgotha, ubi eum crucifixérunt; et cum eo álios duos, hinc et hinc, médium autem Iesum.

Stabant autem iuxta crucem Iesu mater eius, et soror matris eius María Cléopæ, et María Magdaléne.

Cum vidisset ergo Iesus matrem et discipulum stantem quem diligebat, dicit matri: « Mulier, ecce filius tuus »; deinde dicit discipulo: « Ecce mater tua ».

Et ex illa hora accepit eam discipulus in sua.

Postea sciens Iesus quia iam omnia consummata sunt, ut consummaretur Scriptura, dicit: « Sitio ». Vas positum erat aceto plenum; spongiam ergo plenam aceto hyssopo circumponentes obtulerunt ori eius. Cum ergo accepisset Iesus acetum, dixit: « Consummatum est ».

Et, inclinato capite, tradidit spiritum.

Verbum Domini.

V. IN EXSEQUIIS PARVULORUM

A. In exsequiis parvuli baptizati

1

Ant. ad introitum

Mt 25, 34

Veníte, benedícti Patris mei, dicit Dóminus:
percípíte regnum, quod vobis parátum est
ab orígine mundi.

Collecta

Clementíssime Deus, qui sapiéntiæ tuæ consíliis
hunc párvulum, in ipso vitæ límine, ad te vocásti,
preces nostras benígnus exáudi, et præsta,
ut cum ipso,
quem baptísmatis grátia adoptiónis tibi fílium effecísti,
et in regno tuo iam crédimus commorári,
nos étiam ætérnæ vitæ tríbuas esse aliquándo consórtes.
Per Dóminum.

Lectiones ut infra, pp. 1726-1733.

Super oblata

Hæc múnera, tibi, Dómine, obláta sanctífica,
ut, quem paréntes a te donátum tibi reddunt infántem,
ipsum læti in regno tuo mereántur amplécti.
Per Christum.

Præfatio de defunctis, pp. 615-619.

Ant. ad communionem

Cf. Rom 6, 4. 8

Consepúlti cum Christo per baptísmum in mortem,
crédimus quia simul étiam vivémus cum Christo.

Post communionem

Córpore, Dómine,
et Sánguine Fílii tui communióne percépta,
te fidéliter deprecámur,
ut, quos in spem vitæ ætérnæ
sacris dignátus es nutrírre mystériis,
in huius tríbuas vitæ mæróribus confortári.
Per Christum.

2. Aliæ orationes**Collecta**

Deus, qui mæróre scis corda nostra cómprimi
propter huius infántis excéssum,
præsta, ut, quem iam hac vita defúnctum,
te disponénte, deflémus,
ætérnam in cælo sedem credámus adéptum.
Per Dóminum.

Super oblata

Hanc oblatiónem, Deus,
dignáre in nostræ signum devotiónis excípere,
ut, qui tuæ providéntiæ consíliis
submíttimur confidéntes,
tuæ quoque pietátis dulcédine sublevémur.
Per Christum.

Post communionem

Divíno múnere satiáti, te, Dómine, deprecámur,
ut, qui hunc infántem
ad mensam tríbuis regni cæléstis accúbere,
eándem et nos participáre concédas.
Per Christum.

Lectio prima

1

Præcipitabit Dominus mortem in sempiternum.

Lectio libri Isaïæ prophætæ

25, 6 a. 7-9

In die illa:

Fáciet Dóminus exercítuum ómnibus pópulis in monte hoc convívium pínguim.

Et præcipitábit in monte isto fáciem vínculi colligáti super omnes pópulos, et telam quam ordítus est super omnes natiónes.

Præcipitábit mortem in sempitérnum, et áuferet Dóminus Deus lácrimam ab omni fácie, et oppróbrium pópuli sui áuferet de univérsa terra, quia Dóminus locútus est.

Et dicet in die illa: « Ecce Deus noster iste, exspectávimus eum, et salvábit nos; iste Dóminus, sustinúimus eum; exsultábimus et lætábimur in salutári eius ».

Verbum Dómini.

Psalmus responsorius

Ps 22, 1-3. 4. 5. 6 (R.: 1)

R. Dóminus pascit me, et nihil mihi déerit.

¹ Dóminus pascit me, et nihil mihi déerit:

² in páscuis viréntibus me collocávit,

super aquas quiétis edúxit me,

³ ánimam meam refécit.

Dedúxit me super sémitas iustítiæ

propter nomen suum. R.

⁴ Nam et si ambulávero in valle umbræ mortis,
non timébo mala, quóniam tu mecum es.

Virga tua et báculo tuus
ipsa me consoláta sunt. *R.*

5 Parásti in conspéctu meo mensam
advérsus eos qui tríbulant me;
impinguásti in óleo caput meum,
et calix meus redúndat. *R.*

6 Etenim benígnitas et misericórdia subsequéntur me
ómniibus diébus vitæ meæ,
et inhabitábo in domo Dómini
in longitúdinem diérum. *R.*

2

Bonum est præstolari cum silentio salutare Dei.

Léctio libri Lamentatiónum 3, 22-26

Misericórdiæ Dómini, quia non sumus consúpti,
quia non defecérunt miseratiónes eius. Novi dilúculo,
multa est fides tua.

« Pars mea Dóminus », dixit ánima mea; propterea
exspectábo eum.

Bonus est Dóminus sperántibus in eum, ánimæ
quærénti illum; bonum est præstolari cum siléntio sa-
lutáre Dei. — Verbum Dómini.

Psalmus responsorius

Ps 24, 4 bc-5 ab. 6 et 7 bc. 20-21 (*R.*: 1 b)

R. Ad te, Dómine, levávi ánimam meam.

4 Vias tuas, Dómine, demónstra mihi,
et sémitas tuas édoce me.

5 Dírige me in veritaté tua et doce me,
quia tu es Deus salutis meæ. *R.*

- 6 Reminiscere miseratiónum tuárum, Dómine,
et misericordiárum tuárum, quóniam a sáculo sunt.
- 7 Secúndum misericórdiam tuam meménto mei tu,
propter bonitátem tuam, Dómine. *R.*
- 20 Custódi ánimam meam, et érue me;
non erubéscam, quóniam sperávi in te.
- 21 Innocéntia et æquitas custódiant me,
quia sustínui te. *R.*

Lectio secunda

1

Credimus quia simul vivemus cum Christo.

Léctio Epístolæ beáti Pauli apóstoli ad Romános

6, 3-4. 8-9

Fratres:

Ignorátis quia quicúmque baptizáti sumus in Christo Iesu, in morte ipsíus baptizáti sumus? Consepúliti ergo sumus cum illo per baptísmum in mortem, ut, quemádmódu[m] suscitátus est Christus a mórtuis per glóriam Patris, ita et nos in novitáte vitæ ambulémus.

Si autem mórtui sumus cum Christo, crédimus quia simul étiam vivémus cum eo, sciéntes quod Christus suscitátus ex mórtuis iam non móritur, mors illi ultra non dominátur. — Verbum Dómini.

2

Sive vivimus sive morimur, Domini sumus.

Léctio Epístolæ beáti Pauli apóstoli ad Romános

14, 7-9

Fratres:

Nemo nostrum sibi vivit, et nemo sibi móritur. Sive enim vívimus, Dómino vívimus; sive mórimur, Dó-

mino mórimur: sive ergo vívimus sive mórimur, Dómini sumus.

In hoc enim Christus et mórtuus est et vixit, ut et mortuórum et vivórum dominétur.

Verbum Dómini.

3

In Christo omnes vivificabuntur.

Léctio Epístolæ primæ beáti Pauli apóstoli ad Corínthios

15, 20-23

Fratres:

Nunc Christus resurréxit a mórtuis, primitiæ dormiéntium; quóniam enim per hóminem mors, et per hóminem resurréctio mortuórum.

Sicut enim in Adam omnes moriúntur, ita et in Christo omnes vivificabúntur. Unusquisque autem in suo órdine: primitiæ Christus, deínde hi qui sunt Christi in advéntu eius. — Verbum Dómini.

4

Elegit nos Deus in Christo ante mundi constitutionem, ut essemus sancti.

Léctio Epístolæ beáti Pauli apóstoli ad Ephésios 1, 3-5

Benedíctus Deus et Pater Dómini nostri Iesu Christi, qui benedíxit nos in omni benedictióne spiritáli in cæléstibus in Christo; sicut elégit nos in ipso ante mundi constitutióne, ut essémus sancti et immaculáti in conspéctu eius in caritáte; qui prædestinávit nos in adoptióne filiórum per Iesum Christum in ipsum, secúndum beneplácitum voluntátis suæ.

Verbum Dómini.

Semper cum Domino erimus.

Léctio Epístolæ primæ beáti Pauli apóstoli
ad Thessalonicéneses

4, 13-14. 17 b-18

Nólumus vos ignoráre, fratres, de dormiéntibus, ut non contristémini, sicut et céteri qui spem non habent.

Si enim crédimus quod Iesus mórtuus est et resurréxit, ita et Deus eos qui dormiérunt per Iesum addúcet cum eo.

Et sic semper cum Dómino érimus. Itaque consolámini ínvicem in verbis istis.

Verbum Dómini.

Evangelium

1

Alleluia

Cf. Mt 11, 25

℞. Allelúia. √. Benedíctus es, Pater,
Dómine cæli et terræ,
quia mystéria Regni párvulis revelásti.

℞. Allelúia.

Venite ad me, ... et ego reficiam vos.

✠ Léctio sancti Evangélii secúndum Mattháeum

11, 25-30

In illo témpore, respóndens Iesus dixit: « Confíteor tibi, Pater, Dómine cæli et terræ, quia abscondísti hæc a sapiéntibus et prudéntibus, et revelásti ea párvulis.

Ita, Pater, quóniam sic fuit plácitum ante te. Omnia mihi trádicta sunt a Patre meo; et nemo novit Fílium,

nisi Pater; neque Patrem quis novit, nisi Fílius, et cui volúerit Fílius reveláre.

Veníte ad me, omnes qui laborátis et oneráti estis, et ego reficiam vos.

Tóllite iugum meum super vos, et díscite a me quia mitis sum et húmilis corde; et “ inveniétis réquiem animábus vestris ”; iugum enim meum suáve, et onus meum leve est ». — Verbum Dómini.

2

Alleluia

Io 6, 39

℟. Allelúia. ℣. Hæc est volúntas Patris mei,
ut omne, quod dedit mihi,
non perdam ex eo,
sed resúscitem illud in novíssimo die,
dicit Dóminus. ℟. Allelúia.

* *Hæc est voluntas Patris mei
ut omne, quod dedit mihi, non perdam ex eo.*

✠ Lécio sancti Evangélii secúndum Ioánnem 6, 37-40

In illo témpore:

Dixit Iesus turbis: « Omne, quod dat mihi Pater, ad me véniet; et eum, qui venit ad me, non eíciam foras. Quia descénderi de cælo, non ut fáciam voluntátem meam, sed voluntátem eius qui misit me.

Hæc est autem volúntas eius, qui misit me, ut omne, quod dedit mihi, non perdam ex eo, sed resúscitem illud in novíssimo die.

Hæc est autem volúntas Patris mei, ut omnis qui videt Fílium et credit in eum hábeat vitam ætérrnam; et resuscitábo ego eum in novíssimo die ».

Verbum Dómini.

vel brevior

✠ Lécitio sancti Evangélii secúndum Ioannem

6, 37-39

In illo témpore:

Dixit Iesus turbis: « Omne, quod dat mihi Pater, ad me véniet; et eum, qui venit ad me, non eíciam foras. Quia descéndi de cælo, non ut fáciam voluntátem meam, sed voluntátem eius qui misit me.

Hæc est autem volúntas eius, qui misit me, ut omne, quod dedit mihi, non perdam ex eo, sed resúscitem illud in novíssimo die.

Verbum Dómini.

3

Alleluia

2 Cor 1, 3 b-4 a

℞. Allelúia. √. Benedíctus Pater misericordiárum
et Deus totíus consolatiónis,
qui consolátur nos in omni tribulatióne no-
stra. ℞. Allelúia.

Si credideris, videbis gloriam Dei.

✠ Lécitio sancti Evangélii secúndum Ioánnem

11, 32-38. 40

In illo témpore:

Cum venísset María, soror Lázari, ubi erat Iesus, videns eum cécidit ad pedes eius dicens ei: « Dómine, si fuísses hic, non esset mórtuus frater meus ».

Iesus ergo, ut vidit eam plorántem et Iudæos, qui vénerant cum ea, plorántes, frémit spírítu et turbávit se ipsum, et dixit: « Ubi posuístis eum? »

Dicunt ei: « Dómine, veni et vide ». Lacrimátus est Iesus.

Dicébant ergo Iudæi: « Ecce quómodo amábat eum! »

Quidam autem dixerunt ex ipsis: « Non póterat hic, qui apéruit óculos cæci, fácere ut et hic non moreretur? » Iesus ergo rursus fremens in semetípso venit ad monuméntum. Erat autem spelúnca, et lapis superpósitus erat ei.

Dicit Iesus Marthæ: « Nonne dixi tibi quóniam, si credíderis, vidébis glóriam Dei? »

Verbum Dómini.

4

Alleluia

2 Cor 1, 3 b-4 a

℞. Allelúia. ʒ. Benedíctus Pater misericordiárum
et Deus totíus consolatiónis,
qui consolátur nos in omni tribulatióne no-
stra. ℞. Allelúia.

Ecce mater tua.

✠ Lécitio sancti Evangélii secúndum Ioánnem

19, 25-30

In illo témpore:

Stabant iuxta crucem Iesu mater eius, et soror matris eius María Cléopæ, et María Magdaléne. Cum vidíset ergo Iesus matrem et discípulum stantem quem diligébat, dicit matri: « Múlier, ecce fílius tuus »; deín-
de dicit discípulo: « Ecce mater tua ».

Et ex illa hora accépit eam discípulus in sua.

Póstea sciens Iesus quia iam ómnia consummáta sunt, ut consummarétur Scriptúra, dicit: « Sítio ». Vas pósitum erat acéto plenum; spóngiam ergo plenam acéto hyssópo circumponéntes obtulérunt ori eius. Cum ergo accepisset Iesus acétum, dixit: « Consummátum est ».

Et, inclináto cápite, trádidit spíritum.
Verbum Dómini.

B. In exsequiis parvuli nondum baptizati

Si quis parvulus, quem parentes baptizari volebant, ante baptismum mortuus fuerit, Ordinarius loci, adiunctis pastoralibus consideratis, permittere potest ut eius exsequiæ celebrentur in ipsa domo defuncti, aut etiam iuxta illum typum exsequiarum, qui de more pro ceteris in regione adhibetur.

In huiusmodi exsequiis habeatur de more liturgia verbi, prouti in Rituali describitur. Si tamen opportuna aliquando iudicatur Missæ celebratio, adhibeantur textus qui sequuntur.

In catechesi autem advigilandum est, ne doctrina de necessitate baptismi in mentibus fidelium obscuretur.

Ant. ad introitum

Ap 21, 4

Abstérget Deus omnem lácrimam ab óculis eórum,
et mors ultra non erit, neque luctus, neque clamor,
neque dolor erit ultra, quia prima transiérunt.

Collecta

Fidélium tuórum, Dómine, súscipe vota,
ut, quos permíttis infántis sibi erépti desidério déprimi,
eósdem concédas
in tuæ spem miseratiónis fidénter attólli.
Per Dóminum.

Vel:

Scrutátor córdium, Deus, et piíssime consolátor,
qui horum paréntum fidem novísti,
præsta, ut infántem suum,
quem plorant hac vita defúntum,
tuæ séntiant divínæ pietáti commíssum.
Per Dóminum.

Lectiones ut infra, pp. 1736-1739.

Super oblata

Hanc oblatiónem, Deus,
dignáre in nostræ signum devotiónis excípere,
ut, qui tuæ providéntiæ consíliis submittimur confidéntes,
tuæ quoque pietátis dulcédine sublevémur.
Per Christum.

Præfatio de defunctis, pp. 615-619.

Ant. ad communionem

Is 25, 8

Præcipitábit Dóminus mortem in sempitérnum,
et áuferet Deus lácrimam ab omni fácie.

Post communionem

Córpore, Dómine,
et Sánguine Fílii tui communióne percépta,
te fidéliter deprecámur,
ut, quos in spem vitæ ætérnæ
sacris dignátus es nutrírre mystériis,
in huius tríbuas vitæ mæroribus confortári.
Per Christum.

Lectio prior

1

Præcipitabit Dominus mortem in sempiternum.

Lectio libri Isaïæ prophætæ

25, 6 a. 7-8 a

In die illa:

Fáciet Dóminus exercítuum ómnibus pópulis in monte hoc convívium pínguim.

Et præcipitábit in monte isto fáciem vínculi colligáti super omnes pópulos, et telam quam ordítus est super omnes natiónes.

Præcipitábit mortem in sempitérnum, et áuferet Dóminus Deus lácrimam ab omni fácie.

Verbum Dómini.

Psalmus responsorius

Ps 24, 4 bc-5 ab. 6 et 7 bc. 17 et 20 (R.: 3 b)

R. Qui sústinent te, Dómine, non confundéntur.

⁴ Vias tuas, Dómine, demónstra mihi,
et sémitas tuas édoce me.

⁵ Dírige me in veritáte tua et doce me,
quia tu es Deus salútis meæ. R.

⁶ Reminíscere miseratiónum tuárum, Dómine,
et misericordiárum tuárum, quóniam a sáculo sunt.

⁷ Secúndum misericórdiam tuam meménto mei tu,
propter bonitátem tuam, Dómine. R.

¹⁷ Diláta angústias cordis mei,
et de necessitátibus meis érué me.

²⁰ Custódi ánimam meam, et érué me;
non erubéscam, quóniam sperávi in te. R.

Bōnum est præstolari cum silentio salutare Dei.

Lectio libri Lamentationum

3, 22-26

Misericordiæ Dómini, quia non sumus consumpti, quia non defecerunt miseratiónes eius. Novi dilúculo, multa est fides tua.

« Pars mea Dóminus », dixit ánima mea; propterea exspectábo eum.

Bonus est Dóminus sperántibus in eum, ánimæ quærénti illum; bonum est præstolari cum siléntio salutáre Dei. — Verbum Dómini.

Psalmus responsorius

Ps 24, 4 bc-5 ab. 6 et 7 bc. 17 et 20 (R.: 1 b)

R. Ad te, Dómine, levávi ánimam meam.

- 4 Vias tuas, Dómine, demónstra mihi,
et sémitas tuas édoce me.
- 5 Dírige me in veritáte tua et doce me,
quia tu es Deus salutis meæ. R.
- 6 Reminíscere miseratiónum tuárum, Dómine,
et misericordiárum tuárum, quóniam a sáculo sunt.
- 7 Secúndum misericórdiam tuam meménto mei tu,
propter bonitátem tuam, Dómine. R.
- 17 Diláta angústias cordis mei,
et de necessitátibus meis érué me.
- 20 Custódi ánimam meam, et érué me;
non erubéscam, quóniam sperávi in te. R.

Evangelium

1

Alleluia

Ap 1, 5-6

℞. Allelúia. √. Iesus Christus
 est primogénitus mortuórum;
 ipsi glória et impérium
 in sácula sæculórum. Amen.
 ℞. Allelúia.

*Venite ad me, omnes qui laboratis et onerati estis,
 et ego reficiam vos.*

✠ Lécio sancti Evangélii secúndum Mattháeum

11, 27-30

In illo témpore: Respóndens Iesus dixit:

« Omnia mihi trá dita sunt a Patre meo, et nemo novit Fílium, nisi Pater; neque Patrem quis novit, nisi Fílius, et cui volúerit Fílius reveláre.

Veníte ad me, omnes qui laborátis et onerátis estis, et ego reficiam vos. Tóllite iugum meum super vos et díscite a me, quia mitis sum et húmilis corde; et inve niétis réquiem animábus vestris; iugum enim meum suáve, et onus meum leve est ». — Verbum Dómini.

2

Alleluia

2 Cor 1, 3 b-4 a

℞. Allelúia. √. Benedíctus Pater misericordiárum
 et Deus totíus consolatiónis,
 qui consolátur nos in omni tribulatióne no-
 stra. ℞. Allelúia.

Ecce mater tua.

✠ Lécitio sancti Evangélii secúndum Ioánnem

19, 25-30

In illo témpore:

Stabant iuxta crucem Iesu mater eius, et soror matris eius María Cléopæ, et María Magdaléne. Cum vidisset ergo Iesus matrem et discipulum stantem quem diligébat, dicit matri: « Múlier, ecce fílius tuus »; deínde dicit discipulo: « Ecce mater tua ».

Et ex illa hora accépit eam discipulus in sua.

Póstea sciens Iesus quia iam ómnia consummáta sunt, ut consummarétur Scriptúra, dicit: « Sítio ». Vas pósito erat acéto plenum; spóngiam ergo plenam acéto hyssópo circumponéntes obtulérunt ori eius. Cum ergo accepisset Iesus acétum, dixit: « Consummátum est ».

Et, inclináto cápite, trádidit spíritum.

Verbum Dómini.